

VASEGA LAITI AUIVI 2022

MANATU AOA O : E I A I L E A T U A I S O O S E M E A

IANUARI	OLA GALUE		
30	ASO SA TUPULAGA		
	O le taulaga a Kaino, ma le taulaga a Apelu	-	Kenese 4:1 - 6
FEPUARI	OLA GALUE		
6	O Simona ma Anetere'a	-	Mareko 1 : 16 - 17
13	Ua ulufafo Noa mai le vaa	-	Kenese 8 : 15 - 19
20	O Mataio le ao lafoga	-	Mataio 9 : 9
27	Ua faaali le agelu ia Kitiona	-	Faamasino 6: 11 - 13
MATI	IA TATOU ALOLOFA ATU		
6	Ua agalelei le tagata Samaria	-	Luka 10 : 33 - 35
13	Ua alofa Ionatana i lana uo	-	1 Samuelu 19 : 1 - 3
20	Ua pupula le tauaso	-	Mareko 8 : 22 - 26
27	Ua tofia Iosua	-	Iosua 1:1 - 4
APERILA	O IESU E FAAOLA MAI		
3	Ua matua le tama o Mose	-	Esoto 2:11 - 12
10	<i>Aso Sa Laupama</i>		
	Ua tietie atu Iesu i le asini	-	Mataio 21:1 - 7
17	<i>Aso Sa Toetu</i>		
	Ua toetu Iesu	-	Mareko 16:1 - 8
24	Ua fia feinu le nuu o Isaraelu	-	Esoto 17:3 - 6
ME	O GALUEGA LELEI		
1	O Maria ma le u'u manogi	-	Ioane 12:1 - 3
8	(Aso Sa Tinā)		
	Ua faia e le Atua Eva	-	Kenese 2:21 - 23
15	FONOTELE		
22	E alofa Iesu i tamaiti	-	Mataio 19:13 - 15
29	Ua o'o mai le oge	-	Kenese 41: 53 - 57
IUNI	E SILISILI ESE LE ATUA		
5	Konelio le taitai o le toaselau	-	Galuega 10 : 1 -4
12	Ua tatalaina le ato kome	-	Esoto 2:3 - 6
19	Ua te'a le ma'i vevela	-	Luka 4:38 - 39

26	Ua paū Takono	-	1 Samuelu 5 :3 - 4
IULAI			
	OLA TATALO		
3	E le'i fefe Tanielu e tatalo	-	Tanielu 6:7 - 10
10	Ua a'oa'o Iesu i le tatalo	-	Luka 11 : 1 - 4
17	Ua oti Eli	-	1 Samuelu 4: 12 - 18
24	Ua ulufale Iesu i le malumalu	-	Mataio 21:12 - 13
31	O atalii o Samuelu	-	1 Samuelu 8:1 – 5
AOKUSO			
	ALOFA I ISI TAGATA		
7	O le fafine Samaria na alu e utu vai	-	Ioane 4:7 - 9
14	(Aso Sa Tamā)		
	Ua usitai Aperaamo i le Atua	-	Kenese 22 : 1 - 3
21	Ua tauvalaau le tauaso ia Iesu	-	Luka 18:35 - 43
28	E tatau galuega alofa i le sapati	-	Mareko 3: 1 - 6
SETEMA			
	E FESOASONI MAI LE AGAGA O LE ATUA		
4	(Aso Sa Tala Lelei)		
	Talai o le Faaolataga	-	Mataio 28:1 - 7
11	Ua fetogi Setefano i ma'a	-	Galuega 7 : 58 - 60
18	Ua saeia e Samasoni le leona	-	Faamasino 14: 5 - 6
25	O le fua o le sinapi	-	Mareko 4 : 30 - 32
OKETOPA			
	TUMAU I LE ALII		
2	<i>Tapenaga Lotu Tamaiti</i>		
9	<i>Aso Sa Tamaiti</i>		
16	<i>Malologa Lotu Tamaiti</i>		
23	Ua mana'o Aapo i le tovine a Napota	-	1 Tupu 21: 1 - 3
30	Ua toe ola le taule'ale'a	-	Luka 7:11 - 15
NOVEMA			
	TUMAU I LE ALII		
6	Ua tautino Ruta ia Naomi	-	Ruta 1: 16 - 17
13	O Maria ma lona uso o Mareta	-	Ioane 11 : 1 - 4
20	Ua faia le tupua auro	-	Esoto 32 : 1 - 4
27	Ua vavao e Iesu le matagi ma le vai	-	Mataio 8: 23 - 27
TESEMA:			
	O IESU LE FAAOLA		
4	Sakaria le Ositaulaga Sili	-	Luka 1: 5 - 7
11	O le fetu i Sasa'e	-	Mataio 2 : 1 - 2

MANATU TAIALA IANUARI & FEPUARI: OLA GALUE

O lo tatou ola galulue, o se tasi lea o auala tatou te maua ai faamanuiaga a le Atua. O faamanuiaga e atinae ai aiga, nuu, aemaise o lana feau ma lana galuega. O faamanuiaga foi tatou te maua pe afai tatou te faatinoina ma le faamaoni ma tele ai lona viiga.

ASO SA: 30 IANUARI 2022

MATAUPU: O LE TAULAGA A KAINO MA LE TAULAGA A APELU

SINI: Ia malamalama le vasega i le taua o le ave o mea sili faatasi ma le loto lelei o le tagata mo le Atua.

TUSI FAITAU: Kenese 4: 1 – 6

FESOASOANI MO FAIAOGA:

Talofa tamaiti, o le tatou tala i lenei taeao. O le tala i le faiga taulaga a Kaino ma Apelu. O tama nei, o le auuso. O fanau muamua ia Atamu ma Eva. E matua Kaino ae laitiiti Apelu.

O le taulaga tamaiti, o le auala lea sa tapuai ai tagata i le Atua i ona aso o le Feagaiga Tuai. E pei ona faia e Kaino ma Apelu. O le faatinoina o le taulaga tamaiti, e i ai mea e manaomia. E tatau ona i ai se fata faitaulaga. O le fata, sa fa'aaoga ma'a e ati ai. E tatau ona i ai ma ni fafie ma se afi, aemasie o mea e tuu ai i luga o le fata faitaulaga.

Faataitaiga, o taulaga a Kaino ma Apelu. Sa i ai fata faitaulaga ma fafie. Peitai o Kaino, sa ia aumaia fua o ana faatoaga, a o Apelu o uluai tama a ana lafu manu. O le tapuaiga a Kaino ma Apelu, peitai ua silasila le Atua i le taulaga a Apelu ae le silasila i le taulaga a Kaino.

Tamaiti, o le tulaga lea tatou te iloa ai le taulaga ua lelei i le Atua ma le taulaga e le lelei i le silafaga a le Atua. Tatou te le o toe faatinoina ni taulaga faapea. Peitai, o lea ua tatou omai i le lotu ma tatou tatalo i le Atua. O la tatou taulaga lea e ave ai le faafetai, tatou te faatoese ai mo a tatou sese, aemaise tatou te ole atu ai i le Atua ina ia alofa ma faamanuia mai. Ae ia manatua, ia tatou tapuai ma le loto lelei ina ia silasila mai ai le Atua ia te i tatou ma faamanuia mai.

Uiga o Upu:

- | | | | |
|------|-------------|---|---------------------|
| i) | galue fanua | - | fai faatoaga |
| ii) | pepeti | - | lapopoa, tino lelei |
| iii) | silasila | - | vaai, talia |
| iv) | taulaga | - | tapuaiga. |

GALUEGA FAATINO:

Ia auaua'i tamaiti e fai le tatalo o le Alii ma ia fesoasoani ai le faiaoga e faasao ni upu e fesua'i e tamaiti ina ia manatua pea e tamaiti lea tatalo ma faamasani ai i le ola tatalo.

PESE: Faitau le Tusi Paia ma tatalo i aso uma.

Faitau le Tusi Paia ma (tatalo i aso umax2)x2
Ona e tuputupu ai lea x 3

Read your Bible (pray everyday x2) x2
An you grow grow x3

A'OA'OGA:

1. Ia iloa tatalo ma toaga e tatalo.
2. Ia toaga i le aoga Aso Sa ma le lotu.

ASO SA: 6 FEPUARI 2022

MATAUPU: O SIMONA MA ANETEREA

SINI: Ia a'oa'o le vasega ia malamalama, o Simona ma Aneterea, o uluai so'o ia o Iesu na Ia tofia.

TUSI FAITAU: Mareko 1: 16 – 17

FESOASOANI MO FAIAOGA:

Talofa tamaiti, o le tatou tala i lenei taeao, "O Simona ma Aneterea" O le uso i laua, e matua Simona ae laitiiti ai Aneterea. O tagata fai faiva foi i laua. O le la masani o le o lea e fagogota i le vai o Kalilaia, e tausi ai lo latou aiga.

Fai mai le tala tamaiti, ina ua uma ona papatisoina o Iesu, ma lona faaosoosoina i le vao i aso e fasefulu. Ona maliu ane lea o Ia, ma ua amata lana galulega tala'i, e uiga i le malo o le Atua i Kalilaia. Fai mai ua latalata ane Ia i le vai o Kalilaia ma Ia silafia ai le auuso lea o Simona ma Aneterea ua lafo lo la upega i le vai. E lei toe faatali Iesu ma Ia fetalai atu lea ia tei laua e mulimuli mai ia te Ia. Na te faia i laua ma fai faiva i tagata.

Tamaiti, e lei toe faatali foi tama ia, ae mulimuli loa ia Iesu ae tuua o la upega. O uluai so'o ia o Iesu ua Ia tofia i le vai o Kalilaia, o Simona ma Aneterea. O se aoaoga foi lea mo i tatou, ia avea i tatou ma tagata e fiafia e mulimuli ia Iesu. O i tatou o isi so'o, uso po o uo a Iesu, ua filifia mo Ia.

Uiga o Upu:

- i) fetalai - saunoa, tautala
- ii) tagata fai faiva - tagata fagota
- iii) silafia - iloa

GALUEGA FAATINO: Faatumu avanoa

Faatumu avanoa i upu nei:

latalata, Kalilaia, uso, upega, faiva, fetalai, laua, mulimuli

Ua savali ane ia e _____ ane i le vai o _____, ona silafia lea o ia o Simona ma Aneterea lona _____, uan la lafo le _____ i le vai; aua o tagata fai _____ i laua. Ona _____ atu lea o Iesu ia te i _____. Ina _____ mai ia ia te a'u, ou te faia oulua ma fai faiva i tagata.

PESE: Ua ou filifili e mulimuli ia Iesu.

Ua ou filifili e mulimuli ia Iesu x3

Ou te le toe foi, toe foi mai ai

I have decided to folllow Jesus x 3

No turning back, no turning back

A'OA'OGA:

1. Ia tatou fiafia e mulimuli ia Iesu, aua e lelei o Ia.
2. Ia fa ii ttou ma soo/uso o Iesu.
3. O Iesu le uo a tamaiti.

ASO SA: 13 FEPUARI 2022

MATAUPU: UA ULUFAFO NOA MAI LE VA'A

SINI: Ia a'oa'o le vasega ina ia malamalama, e manuia le tagata e usitai i le Atua.

TUSI FAITAU: Kenese 8: 15 – 19 (Mo le Faiaoga)
Kenese 8: 15,16 (Mo le Vasega)

FESOASOANI MO FAIAOGA:

O le tasi lenei o tala ua masani i le faalogo a tatou le fanau. O le tala i le toaina o Noa ma lona usitai i le Atua ma lana faatonuga, ina ia na faia se va'a, e lavea'iina ai lona aiga ma manu mai le lolo o le a aumaia e le Atua i le lalolagi.

Ua mavae le lolo ma ua faaumatia le lalolagi agasala. Ua pa'ulia le vaa i luga o le mauga o Ararata. Ua ulufafo Noa mai le vaa ma ia iloa ai le vai ua maui atu ae aliali mai le eleele matutu. O le faailoga o le alofa tunoa o le Atua mo Noa ma lona aiga. O le amataga foi lea o manuia e maua e Noa ma lona aiga. Ua faasaoina i latou mai le lolo. O i latou foi ia o le a toe tutupu mai ai nisi tagata se toatele ma nofoia le lalolagi matagofie na faia e le Atua mo le tagata. Ioe, ua manuia Noa ma lona aiga, ona ua usitai i le Atua. Peitai, ana faapea foi e le usitai Noa ma le faia se va'a, e le maua foi ia manuia ae feoti uma i le lolo e pei o isi tagata.

Tamaiti, e faapea foi i tatou, ia tatou usiusitai ma faalogo i matua, ma ia tatou matatau i le Atua ona tatou maua lea o manuia e tele mai le Atua. A leai, ona tatou le maua foi lea o faamanuiaga mai le Atua. Peitai tamaiti, o le finagalo lava o le Atua mo i tatou, ia faalogo ma usitai ona manuia lea, e pei ona fai mai ai i le tulafono e lima.

Uiga o Upu:

- i) uluola - faatoateleina
- ii) fetolofi - manu e sosolo i le manava

GALUEGA FAATINO : Tusiga Fuaiupu

Fa'aaoga upu o lo o lisi atu i lalo e fai ai sau fuaiupu, E fautuaina foi Lau Susuga le Faiaoga ina ia faaogaina ata o le mataupu pe afai na tapena ni ata, e faaali i fanau ma tusi mai ai ni a latou fuaiupu

(ulufafo, fafo, va'a, usitai, manu felelei)

PESE: Faalogo ma Usitai

Faalogo ma usitai
 E leai se isi ala
 E fiafia ai Iesu
 Na o le faalogo ma usitai

A'OA'OGA:

1. Ia tatou usitai i le Atua e ala i matua ona tatou manuia lea.
2. E finagalo le Atua ina ia tatou manuia ae le o le malaia.

ASO SA : 20 Fepuari 2022

MATAUPU : O MATAIO LE AO LAFOGA

SINI : Ia malamalama le vasega i le taliaina lelei e Mataio o le valaau mai o Iesu e fai o ia ma soo.

TUSI FAITAU : Mataio 9:9

FESOASOANI MO FAIAOGA:

I le amataga o le mataupu leni e 9, na faamalolo ai e Iesu le tagata ma'i supa. Ina ua maliu ese mai o Ia mai lea nofoaga, na ia iloa ai Mataio le ao lafoga o lo o nofo i le fale e tali ai taulaga. E lei toe faatali Iesu, ae na ia fetalai loa i ai ina ia mulimuli atu ia te Ia.

O le ao lafoga e pei ona faia e Mataio, o le tagata lea na te tusitusia igoa o tagata ma a latou tupe e totogi atu ai a latou lafoga. O se galuega sa faamoemoe foi i ai Mataio, auā le tausaiaina o lona aiga. Peitai, e lei toe faatali Mataio ina ua fetalai atu i ai Iesu e mulimuli atu ia te Ia. O i tatou te iloa ai ua talia lelei e Mataio ma lona loto atoa, le valaau a Iesu ina ia fai o Ia ma ona soo i lana galuega.

O se aoaoga mo tatou le fanau, e pei ona talia e Mataio ma le loto atoa le valaau mai a Iesu. E faapea foi i tatou, ia tatou faia le amio lelei e faailoa atu ai lo tatou talia o Iesu e fai ma o tatou Faaola. Ia faamuamua pea Iesu i lo tatou ola, ona tatou manuia ai lea. Ia avea i tatou ma tagata e mulimuli ia Iesu aua o Ia tatou te maua ai le ola.

GALUEGA FAATINO:FESILI (Ioe/Leai)

Ia saunia ni pepa malo (cardboards) ma tusia ai fesili ua saunia. Ia auaua'i taitasi fesili ma faaali i tamaiti, e tali i le Ioe poo le Leai

FESILI:

1. Na fetalai Iesu ia Mataio ina ua alu ese ma le fale e tali ai taulaga.
2. O Mataio e leo se ao lafoga
3. Na talia lelei e Mataio le valaau a Iesu
4. Na fetalai Iesu ia Mataio e mulimuli atu ia te ia
5. O Mataio na fai ma soo o Iesu

PESE: O MATAIO LE AO LAFOGA

O Mataio le ao lafoga (ao lafoga)

Sa i ai i le fale tali ai taulaga (tali taulaga)

Fetalai Iesu ina tulai

Ma mulimuli mai ia te ia

Aua o ia ua filifilia

E auaua atu mo Ia.....Fati : Matou nei mai i ma o.

AOAOGA:

1. Ia tatou fiafia e mulimuli i ala o Iesu
2. Ia fai i tatou ma soo o Iesu
3. E manuia o tatou olaga pe a mulimuli i ala o Iesu.

ASO SA: 27 FEPUARI 2022

MATAUPU: UA FA'AALI LE AGELU IA KITIONA

SINI: Ia a'oa'o le vasega ia malamalama, o le agelu a le Atua na ia ta'u atu le feau ia Kitiona.

TUSI FAITAU: Faamasino 6: 11 – 24 (mo le Faiaoga)
Faamasino 6: 11 – 13 (mo le Vasega)

FESOASOANI MO FAIAOGA:

O le agelu tamaiti, o i latou ia o avefeau a le Atua. Latou te aumaia le finagalo o le Atua ma faailoa atu i le tagata o lo o finagalo le Atua e ave i ai le feau. E pei ona fai mai le tatou mataupu, Ua fa'aali le agelu ia Kitiona.” O lona uiga, na sau le agelu lea e ta'u mai ia Kitiona le feau mai le Atua mo ia.

O Kitiona, o le atalii o Ioasa mai le nuu o Apieserū. Fai mai a o i ai Kitiona i lana galuega, o le sasaina o saito i le mea e soli ai vine i le fanua o Ofira ina ia lilo ia Mitiana (O se faiga na fai e Isaraelu e nanā ai a latou saito mai tagata Mitiana). Na sau ai le agelu ma nofo i lalo o le laau o le tapeneto ma fai atu ia Kitiona. “Oe na le toa malosi, o ia te oe le Alii.” O lona uiga, ua oo mai le feau a le Atua ia Kitiona, ia lototele auā o le a faia o ia e le Atua ma toa malosi o Isaraelu. O le taimi lea tamaiti, o lo o pulea e Mitiana le nuu o Isaraelu, ona ua amio leaga Isaraelu i luma o le Atua. E ui la i le tali a Kitiona o lo o i le fuaiupu e 13, na fesili ai pe aisea ua tuuina ai e le Atua i latou i lima o Mitiana, a o le Atua na faia vavega i taimi o latou tamā. Peitai, o le faamoemoe o le feau, na aumai e le agelu mai le Atua ma faailoa atu ia Kitiona; E fai o ia ma toa malosi na te tauina le taua ma Mitiana ina ia lavea'iina Isaraelu le nuu o le Atua; auā ua faafogaina e le Atua le alaga a tagata Isaraelu. Ua salamo ma ua fia saoloto mai sauaga a Mitiana.

O le tatou tala lenei tamaiti, a o se feau taua mo i tatou. Ia fai i tatou ma ave feau a le Atua e faailoa atu lona finagalo; e ala i la tatou amio lelei. Ia alofa i so o se tasi, ma ia loto faamagalo. E mafai foi ona faia e le Atua i tatou ma toa i aso o i luma pe a tatou tumau i le faatuatua ia te Ia. O Iesu le uo a tamaiti, na Ia aumaia le feau o le salamō, ina ia tatou salamō mai ia tatou amio leaga.

Uiga o Upu:

- | | | | |
|------|----------|---|---|
| i) | tapeneto | - | igoa o le laau (laau tele) |
| ii) | Ofira | - | o le igoa o le fanua o lo o tu ai le laau o le tapeneto |
| iii) | fa'aali | - | faailoa |
| iv) | Apieseru | - | o le nuu o Ioasa le tama o Kitona |

GALUEGA FAATINO: Faafesootaiga o upu ma o latou uiga

Faafesootai upu i latou uiga sa'o.

- | | | | |
|----|----------|---|-------------------|
| 1. | agelu | - | atalii |
| 2. | Kitiona | - | faailoa |
| 3. | tapeneto | - | igoa o le fanua |
| 4. | fa'aali | - | avefeau a le Atua |
| 5. | Ofira | - | o le laau tele |

PESE:

O le Atua silisili ese	} x 2
E malosi ofoofogia	
E leai se mea	
E le mafai ona ia faia, ha! ha!	
Na ia faia o atumauga	
Na ia faia o vaitafe	
O ona folliga na vaai i le lalolagi, ha! ha!	

O le Atua silisili ese
 E malosi ofoofogia
 E leai se mea
 E lemafai ona Ia faia ha! ha!

A'OA'OGA:

1. Ia fai i tatou ma avefeau lelei.
2. Ia ola usitai.
3. O le finagalo o le Atua, ia fai le amio lelei.

MANATU TAIALA MO MATI: IA TATOU ALOLOFA ATU

O le poloaiga a Iesu; "Ia e alofa atu i le Atua ma lou loto atoa, ma lou malosi atoa ma lou agaga atoa; ia e alofa atu i le lua te tuaoi ia pei o oe lava ia te oe." O lona uiga, ia tatou faatino le galuega alofa i lona atoatoa e pei foi ona Ia faia mo i tatou e ala i le faaolataga na Ia saunia mo i tatou.

ASO SA: 6 MATI 2022

MATAUPU: UA AGALELEI LE TAGATA SAMARIA

SINI: Ia a’oa’o le vasega ia malamalama i le galuega lelei ma le alofa na faia e le tagata Samaria.

TUSI FAITAU: Luka 10: 33 – 35

FESOASOANI MO FAIAOGA:

O le tatou tala i lenei taeao, e faatatau i le galuega alofa na faia e le tagata Samaria i le tagata puapuagatia sa taatia i le ala. O le faataoto na faamatalaina e Iesu e tali atu ai i le fesili a se tasi o a’oa’o Iutaia, pe o le a se mea na te faia na te maua ai le ola faavavau.

Fai mai o le tagata na alu ifo mai Ierusalemia i Ieriko. Peitai na fasia o ia e tagata fao mea. Ua ave uma e i latou ana mea, ae taatia ai o ia ma ona manu’a i le ala. Na alu ane le faitaulaga/ositaulaga ua ui i le isi itu. Na faapea foi i le sa Levi, na ona matamata i le tagata tigaina ae le faia i ai se galuega alofa. Peitai, o le tagata Samaria, ua alu ane ua alofa ia te ia. Ua fusifusi/nonoa i ona manu’a, liligi i ai le suauu ma le uaina ma faatietie i lana manu ma agai i le fale talimalo ina ia lavea’iina o ia. Na ofo atu foi e ia o tupe i le ana le fale talimalo e tausi ai le tagata puapuagatia.

Tamaiti, e le o se alofa lea na faatinoina e le faitaulaga ma le sa Levi, ina ua la le ofoina atu se fesoasoani mo le tagata ua mafatia. Ae mau le agalelei o le tagata Samaria, na ia avatu ana mea uma e fesoasoani ai i lea tagata ina ia faaola ia te ia. O le galuega lea e manao i ai Iesu ona maua lea o le ola faavavau, o le alofa i so o se tagata.

E faapea foi i tatou le fanau, ia tatou alolofa atu i so o se tasi o lo o manaomia le fesoasoani. Ia tatou alolofa i matua, uso, tuafafine, tuagane ma so o se tasi lava. O lo tatou alolofa foi lena ia Iesu.

Uiga o Upu:

- i) tenari - tupe
- ii) matai - pule

GALUEGA FAATINO: TALIGA FESILI

Tali fesili nei mai le tala sa faitauina mai le Tusi Paia.

1. E mai fea le tagata lea sa faia le galuega alofa?

Tali: O le tagata mai Samaria

2. O fea na ave ai e le tagata Samaria le tagata puapuagatia ma tuu ai?

Tali: Na ave tuu i le fale e tali ai malo.

3. Na ave e le tagata Samaria se tupe i le pule o le fale talimalo pe leai?

Tali: Ioe, na ave tupe e tausii ai le tagata mafatia.

PESE: ALOFA IESU I AI TATOU UMA

E alofa Iesu i ai (tatou uma x3)

E alofa Iesu i ai tatou uma

Alofa i ai tatou uma

Alofa ia Tama, alofa ia tina

Tama matua ma le teine laitiiti

Alofa ia te oe, alofa ia te a'u

Alofa i ai tatou uma.

A'OA'OGA:

1. Ia alofa i so o se tasi.
2. Aua le faailoga tagata.

ASO SA: 13 MATI 2022

MATAUPU: UA ALOFA IONATANA I LANA UO

SINI: Ia a'oa'o le vasega ia malamalama i le alofa o Ionatana ia Tavita na faasaoina ai o ia.

TUSI FAITAU: 1 Samuelu 19: 1 – 3

FESOASOANI MO FAIAOGA:

O le tatou mataupu i leni taeao, e faatatau i le faigauo a Ionatana ma Tavita. O se faigauo e mafanafana tele. O le alofa o Ionatana ia Tavita, ua pei ai i laua o se uso. E faapea foi Tavita ia Ionatana.

Manatua foi, o Ionatana o le atalii lea o Saulo le tupu o Isaraelu. A o Tavita, na i ai i le maota o le tupu ona o lona poto e ta le kitara ma usu pese mo le tupu. Peitai, ua ita Saulo ia Tavita ona ua toatele tagata Isaraelu ua fiafia ia Tavita nai lo Saulo, ona o lona toa i le tauina o taua. Ina ua iloa e Ionatana le upu a lona tama ina ia fasiotia Tavita. Na ia vave loa ona faailoa ia Tavita ma fai ai le tonu; ina ia alu Tavita e lafi lilo. O a lava ni folafolaga a Saulo i ni auala e fasiotia ai Tavita. O le a ia alu atu ma ta'u atu ia Tavita ina ia faasaoina ai o ia ma faaolaina. E maeu le alofa o Ionatana i lana uo o Tavita.

E tatau foi ona faapea i tatou le fanau. Ia tatou alolofa iā tatou uo, ia ma so o se tasi lava. E pei lava ona faia e le tatou uo o Iesu. Na ofoina mai lona ola ina ia faasaoina ma faaolaina i tatou.

GALUEGA FAATINO: TALIGA FESILI

Fesili

1. O ai le igoa o le tamā o Ionatana?

Tali: O Saulo.

2. O ai le igoa o le uo a Ionatana?

Tali: O Tavita

3. Aisea na alofa ai Ionatana ia Tavita?

Tali: Ua manao Saulo e fasioti ia te ia.

PESE: ALOFA IONATANA IA TAVITA

Tagata ua fiafia ma patipati

Mo Tavita le tagata sili

Saulo ua taupule e fasioti

Tavita lea ua fai ma ona fili

Ae ua alofa Ionatana

Ia Tavita ina ia ola.....(Fati: Twinkle Little Star)

A'OA'OGA:

1. Ia alofa faamaoni i so o se tasi.

2. E alofa Iesu ia i tatou o ana uo.

ASO SA : 20 MATI 2022

MATAUPU : UA PUPULA LE TAUASO

SINI : Ia malamalama le vasega o le mana faaola o Iesu na toe pupula ai le tauaso.

TUSI FAITAU : Mareko 8 : 22 – 26 (Mo le Faiaoga)
Mareko 8: 24, 25 (Mo le Vasega)

FESOASOANI MO FAIAOGA:

O le tauaso o le tagata lea e le mafai ona pupula ona mata. (*Moeiini uma tatou? Ia toe pupula mai,,*) Ia e faapena le tagata tauaso e pogisa lana vaai ma e na te le iloa foi se mea.

Fai mai le tala ina ua oo le galuega tala'i a Iesu i le nuu o Petesaita, ona omai ai lea o tagata ua aumai ia te Ia le tagata tauaso. Ua latou aioi atu ia Iesu ina ia pa'i atu ona aao ia te ia ma faapupula ona mata. Na talia e Iesu, ona ia taitai lea o ia i tua o le aai. Ua ia feanu i mata o le tauaso ma fesili i ai poo ua ona iloa atu se mea. Na tali le tauaso, ua na iloa tagata e pei o laau o lo o savavali. Ua toe faaee atu aao o Iesu i mata o le tauaso, ona tepa ae lea o le tauaso ua lelei lana vaai.

E lei afaina i le tauaso le auala na faaogaina e Iesu e faamalolo ai o ia. Ae na o le fiafia ona ua mafai ona pupula ona mata ma iloa ai le lalolagi matagofie. Ua aao mai foi lenei tala ia i tatou le fanau, e mafaia e Iesu mea uma lava. O a lava ma'i ma puapuaga e oo mai, ia tatou tatalo ma le faamoemoe i le mana o le Alii Faaola, o Ia na te faia vavega i lo tatou ola.

GALUEGA FAATINO: PASO

Saili mai upu nei i totonu o le paso?

Iesu, tauaso, pupula, mata, faaee, faamalolo.

A	T	G	H	K	L	O	P	I	O
F	A	A	E	E	E	F	G	K	L
A	U	S	F	G	P	O	I	U	L
F	A	A	M	A	L	O	L	O	E
I	S	N	M	L	O	U	I	P	O
E	O	E	R	T	F	K	L	O	P
S	S	A	P	P	U	P	U	L	A
U	E	M	A	T	A	N	M	L	O

PESE : O lima o Iesu....

O lima o Iesu, o lima agalelei

E alofa ai i tagata uma

Faamalolo i tagata mamai ma faamanuia i tamaiti

O nai ona lima e auauna atu

Tali lau valaau

O lima o Iesu o lima agalelei

E alofa ai i tagata uma

AOAOGA:

1. E mafaia e Iesu mea uma
2. Ua faapupula e Iesu le tauaso
3. O Iesu le fomai sili

ASO SA: 27 MATI 2022

MATAUPU: UA TOFIA IOSUA

SINI: Ia a’oa’o le vasega ia malamalama ua tofia Iosua e le Atua, e fai ma taitai ia Isaraelu.

TUSI FAITAU: Iosua 1: 1 – 11(Mo le Faiaoga)
Iosua 1: 1 – 4 (Mo le Vasega)

FESOASOANI MO FAIAOGA:

O Iosua, o lona tamā o Nuno. O le Isaraelu ma o se tagata e toa ma lototele, a o auauna ai o ia iā Mose. O se tagata e finau lona loto i mea lelei. O le tama foi e amio lelei, auā o le tagata e fiafia i le Atua. E tele foi taimi sa vaivai ai loto o Isaraelu, a o Iosua na te tulai atu ma faaloto tele i le nuu, ma faamanatu i ai le Atua soifua lea o lo o ‘au ma i latou.

O lona faamaoni iā Mose ma lona tumau i le Atua, lea ua fetalai loa i ai le Atua ma tofia e fai ma taitai ia Isaraelu, ina ua mavae le oti ai o Mose, e pei ona faamatalaina i le tatou tusi sa faitauina.

O lea ua tofia Iosua e le Atua e fai ma taitai, ma ua tuu atu ai foi ma ona tiute. O ia, na te taitaiina le nuu ma sopoia le vai o Ioritana ona taunuu loa lea i Kanana. A taunuu foi i Kanana, o mea uma po o nuu uma latou te ui atu ai, e avatu lava e le Atua mo i latou. E foai foi e le Atua ni eleele e fai mo latou.

Ioe tamaiti, tofia lava e le Atua ia Iosua, ona o se toa ma o se tagata e talitonu ma faatuatua i le Atua. E le palaai ma e le fiu gofie. E faapea foi i tatou le fanau, ia tatou ava i matua ma toaga mai le aoga Aso Sa ma le lotu. E faapea foi i aoga, auā o lo tatou tiute lea ua aumaia e le Atua mo lenei taimi. ‘Aua nei tatou faavaivai gofie ma pala’a’ai i ai, a ia toa o tatou loto ma lototetele, e faigofie mea uma ina ua tatou talitonu ma faatuatua, e au pea le Atua ma i tatou.

GALUEGA FAATINO: Faatulagaina sa’o o fuaiupu.

Faatulaga sa’o fuaiupu nei i lona faasologa sa’o e pei ona i ai i le tusi faitau.

1. O mea uma lava e solia e outou alofivae
2. Ona fetalai lea o le Atua ia Iosua.
3. E afua i le vao ma Lapanona lena.
4. Ua mavae le oti o Mose le auaua a le Alii.

Tali: 1. 4, 2. 2, 3. 1, 4. 3

PESE: Na tofia e le Atua Iosua
 Ina ia taitai lona nuu (lona nuu)
 Aua o lo o lumanai atu le nuu lea o manū
 Sopoia atu Ioritana lena
 Ma ulufale atu i le nuu
 O manuia mai le Atua mo i latou..... (fati: Na tofia e le Atua Samoa)

A'OA'OGA:

1. Ia tumau i le faatuatua i le Atua.
2. Ia loto tele i le faatino au galuega
3. O Iosua o se taitai loto tele.

MANATU TAIALA O APERILA: O IESU E FAAOLA MAI

O le faamoemoe maualuga lava lea o le Atua, na afio mai ai i lenei lalolagi e ala ia Iesu Keriso. Ia faaola le lalolagi atoa mai le agasala, ma ia toe fausia ma faafou le tagata, ina ia ona maua pea manuia o le Atua e ala i lana Faaolataga.

ASO SA: 3 APERILA 2022

MATAUPU: UA MATUA LE TAMA O MOSE

SINI: Ia malamalama le fanau, ua matua Mose ma ua alu atu ma fesoasoani i tagata Isaraelu, a'o feagai i latou ma galuega i Aikupito.

TUSI FAITAU: Esoto 2: 11 – 12

FESOASOANI MO FAIAOGA:

Ua matua le tama o Mose. Ua ia fealualua'i solo ma vaavaai ma le alofa, a'o feagai ona tagata ma galuega mamafa. E fai o le tigaina i galuega, ae o le sauaina foi e tagata Aikupito. Ua iloa e Mose le tasi Aikupito ua na fasi i lona uso sa Eperu, ona ia taumafai ai lea e lavea'i ia te ia. Ua

ia tilotilo ma vaavaai solo i itu uma, ona ia iloa ai lea, e leai se tasi o ona iloa maia ia, ona ia fasi lea o le Aikupito ma tanu ia te ia i le oneone. O le alofa o Mose, ma lona naunau ia faaola lona uso a Isaraelu, na ia fia ai lea tulaga i le tagata Aikupito. Aemaise ai, ua ia mautinoa, o ia lava o le Isaraelu moni.

Fanau, e leai lava se isi o i tatou e le alofa i sona uso, le tuagane po o le tuafafine. Tatou te taumafai lava e fesoasoani ia i latou, pe a feagai ma faafitauli. Po o le a lo tatou vaivai, tatou te lagona lava le alofa e lavea'i ai le isi ou uso nai mea e tutupu o le ola. E manaomia lo tatou galulue faatasi ma ola felagolagoma'i.

GALUEGA FAATINO: FEFAASOAIGA

Ia fefaasoa'i lau susuga le Faiaoga ma le vasega, e uiga i lenei mataupu. Ia faa-talanoa ni vaega lelei e tatau ona fai pe a oo i taimi e ono tupu ai se tauaimisa i le va o le isi tamaitiiti i le isi tamaitiiti.

(Faataitaiga: Ina ua fasi e Mose le Aikupito ma natia i le oneone)

E lelei pe a fefaasoa'i i ni manatu faapea:-

- Sa tatau ona vaovao e Mose le Isaraelu ma le Aikupito
- Ia maua le ola faamagalo
- Aua le fasi tamaitiiti
- Ia ola galulue faatasi
- Ia faafaigofie le faamatalaina o le tala i fanau.

PESE: Ua matua le tama o Mose
 Le tama o Mose
 Ua leai lava sona popole
 Sona popole
 Ua na fasi le Aikupito
 Ma tanu i le oneone
 Le Isaraelu ua faasaoina e Mose.....(fati: La ta penina o le auro lea)

A'OA'OGA:

1. Alofa i lou uso
2. E manaomia lo tatou galulue faatasi
3. Ia e maua le loto faamagalo.

ASO SA: 10 APERILA 2020(ASO SA LAUPAMA)

MATAUPU: UA TIETIE ATU IESU I LE ASINI

SINI: Ia a’oa’oina le fanau, o le tietie atu o Iesu i le asini, o le amataga lava lea o lana malaga faa-tupu i Ierusalem.

TUSI FAITAU: Mataio 21: 1 – 7 (Mo le Faiaoga)
Mataio 21:6-7 (Mo le Vasega)

FESOASOANI MO FAIAOGA:

O le amataga lea o le malaga faatupu a Iesu i totonu o Ierusalem. Na ia augani atu ai i ona so’o e toalua, e o atu i le aai e latalata i Ierusalem, ma tatalaina mai ai le asini o lo o nonoa faatasi ma lana tama, ia te Ia. Na fetalai ai foi Iesu ia te i laua, pe afai ane se tasi, ona la tali faatasi atu ai lea “E manao i ai le Alii.”

Ua la aumaia le asini i le Alii, ua faaee i ai o latou ofu ma faatietie ai o Ia. A o le taunuuga lava lea o upu a le Perofeta o Sakaria (Sakaria 9: 9) o lo o faapea mai “*Ia outou fai atu i le tama fafine a Siona, faauta, o lo o afio mai ia te oe lou Tupu, ua agamalu o ia, o lo o tietie i le asini, o le tamai asini foi.*”

Ioe le fanau, o le afio mai o Iesu i lana malaga faatupu leni o se malaga a le Tupu o lo o sau ma le Filemu, o le Tupu loto maulalo. O lo o Afio mai e faataunuu lana galuega faaola mo le tagata. Ia tatou manatua, o le malo o le Atua, ua folafola mai e Iesu, o se malo filemu, o se malo alofa e agamalu ma lavea’i i so o se tagata. Ma e ao foi ona tatou olaina amioga a leni malo. Ia tatou maua le filemu ma le loto alofa, aemaise ia fe-agalelei ai i so o se tagata.

GALUEGA FAATINO: FAATINO LE TALA

O le matagofie lava o leni tala mo le fanau, o le faatinoina. Ia faatino le tala, ina ia aumai i tamaiti, se vaaiga tonu na tupu i lea aso, e uiga i le amataga o le malaga faa-Tupu leni a Iesu.

PESE: O Iesu lava na fetalai
Ia oulua o i le aai
Le asini o lo o nonoa ai
Ina tatala ma taitai mai
O Iesu ua tietie ai

Le faaolataga ua oo mai
 O Iesu le tupu agamalu
 O le Alii o le Filemu.....(fati: Ina tutu i luga- Pese & Viiga # 167)

A'OA'OGA:

1. E alofa Iesu i tagata uma.
2. E manuia le tamaitiiti e loto maulalo ma agamalu.
3. Talia ma le faamaoni Iesu i o tatou loto.

ASO SA: 17 APERILA 2022(ASO SA TOETU)

MATAUPU: UA TOE TU IESU

SINI: Ia a'oa'oina le vasega ia malamalama, o le toetu o Iesu, o le manumalo lava lea mai le pule a le oti ma le tuugamau.

TUSI FAITAU: Mareko 16: 1 – 8 (Mo le Faiaoga)
 Mareko 16: 6-7 (Mo le Vasega)

FESOASOANI MO FAIAOGA:

I le tusi a Mareko sa faitauina, na faatau e Maria le Makatala, o Maria le tinā o Iakopo ma Salome o mea manogi ina ia o latou o atu e uu ai le tino maliu o Iesu. O se galuega sa faia ma le loto atoa, o le ofoina atu o mea lelei uma mo Iesu, a o le faailoga lava lea o tinā e moni lo latou alolofa ma le ola fia tautua i le Talalelei ua a'oa'o mai e le Alii. E ui o se galuega sa faia ma le loto atoa, ae sa i ai lava le manatu le mautinoa ma le le mautonu, auā e le iloa po o ai e fulieseina le maa mo latou.

Peitai, na lagona lo latou mautonu, ina ua taunuu atu ua uma ona fulieseina le maa. Ma o latou vaaia ai se taulealea o lo o ofu i se ofu paepae tatapuvae. Ua faapea mai – *“Aua tou te matatau, o lo o outou saili ia Iesu le Nasareta o le na faasatauroinaua tu o ia....”* Ona latou oatu ai lea i fafo ma sosola ese i le tuugamau ua fefefe lava i latou.

Le fanau e, o tinā nei, o uluai molimau nei i le toetu mai o Iesu. O i latou o ave feau na latou tau atu le Talalelei i le au so'o fememea'i. O le feau mo tatou le fanau, ia fai i tatou ma avefeau o le Talalelei i le toetu mai o Iesu i isi tamaiti. Faafefea ona faatino lea galuega o le fai ma ave feau a

Iesu toetu? Ia lagona le alofa i isi tamaiti, ia fai au upu ma upu faamalosiua mo le isi tagata, ia maua ai le fiafia ma le ola felagolagoma'i. Tautala i le upu moni, ma le mea sa'o ae le o le pepelo ma le faaoleole.

Uiga o Upu

- | | | | |
|------|---------------------------|---|-------------------------------|
| i) | fetautalatalaa;i | - | talanoa |
| ii) | aso muamua o le vaisapati | - | Aso Sa |
| iii) | ofu tatapuvae | - | ofu e gata i tapuvae (kimoga) |
| iv) | matatau | - | fefe |

GALUEGA FAATINO: FAATULAGAINA O FUAIUPU

Faatulaga mai fuaiupu i lona faasologa sa'o, ina ia maua ai le uiga moni o le tala sa faitauina (Mareko 16: 1 – 8)

1. Ua tu o ia, e le o iinei.
2. Ua ofu o ia i le ofu pa'epa'e tatapuvae
3. Ona faatau lea e Maria le Makatala o mea manogi.
4. Ua latou le fai atu foi se upu i se tasi.
5. O ai ea se na te fulieseina le maa mo i tatou.

Tali: 1) 3 2) 5 3) 2 4) 1 5) 4

PESE: UA TOETU IESU

Ua toetu mai Iesu

Ua tuua le tuugamau

E moni ua Ia toetu mai

Le oti ua Ia malo ai

O le faaolataga lena

Mo le Au Faatuatua

Ou te le toe foi x 2.....Fati : Ua ou filifili e mulimuli ia Iesu.

A'OA'OGA:

1. Ua manumalo e Iesu le oti ma le tuugamau.
2. Tatou te manuia pe a mulimuli ia Iesu.
3. Tala'i atu le toetu i isi tagata.

ASO SA: 24 APERILA 2022

MATAUPU: UA FIA FEINU LE NUU O ISARAEU

SINI: Ia a’oa’oina le fanau ia malamalama, o le Atua na na aumaia le vai e feinu ai le nuu o Isaraelu.

TUSI FAITAU: Esoto 17: 3 – 6

FESOASOANI MO FAIAOGA:

O le malaga ese o Isaraelu mai Aikuptio, o se malaga sa feagai ma faafitauli i le ala. O le isi la lea faafitauli, o le fia feinu, auā e leai se vai na o latou maua i Refiti, le ogaeleele sa tolauapi ai. Ua fia feinu le nuu ma ua latou finau atu ma muimui ia Mose, ua fai atu, “Se a le mea na e ava’e ai ia te i matou nai Aikuptio, e fasioti ai ia te i matou, ma a matou fanau, atoa ma a matou manu i le fia inu? Ona alaga lea o Mose i le Atua e tusa ma le muimuiga a le nuu.

Tamaiti, e leai se mea e faigata i le Atua. O le Atua foi, e tali i manao o ona tagata. A lea na fetalai mai ia Mose, na te taia le papa i lona tootoo, ona puna mai ai lea o le vai, na feinu ai Isaraelu.

Le fanau e, e faia lava e le Atua vavega mo tatou, pe afai tatou te talitonu ma le faamaoni ia te Ia. E le lelei le tulaga na oo ai Isaraelu, aua ua latou le talitonu i le Atua, na te mafai ona lavea’i ia te i latou, e ala ina ua latou muimui i le fia feinu.

Manatua, o a faafitauli o le ola tatou te fetaia’i, e maua lo tatou fesoasoani mai le Atua. O Ia lava na te tausi ma lavea’i i tatou, pe afai tatou te matua tumau ma faamaoni ia te Ia.

Uiga o Upu:

- | | | | |
|------|----------|---|----------------|
| i) | muimui | - | faitio, tomumu |
| ii) | tofotofo | - | lu’i |
| iii) | taia | - | ta |

GALUEGA FAATINO: Taliga Fesili

1. O ai na muimui i ai tagata Isaraelu?

Tali: O Mose

2. Aisea na muimui ai?

Tali: O le fia feinu

3. O a upu a Mose na fai i le Atua?

Tali: “Se a se mea ou te faia i lenei nuu, e toe ina latou fetogi mai ia tei a’u i maa.”

4. O le a na fa’aaoga e Mose ta ai le papa?

Tali: O le tootoo

5. Faamata, o ai na mafua ai ona maua le vai na feinu ai Isaraelu. O Mose po o le Atua?

Tali: O le Atua.

PESE: ISARAEU UA MUIMUI

Isaraelu ua muimui mai

Se Mose aumai se vai

E faamalie ai o le galala

Aua o le a fano lava

Si toeaina o Mose ua tafiti solo

Ua uu loa ma lona tootoo

Ua taia loa le papa ua puna mai le vai

Isaraelu ua feinu ai.....Fati:A’ea’e i luga o mauga...

A’OA’OGA:

1. O le Atua, o lo tatou fesoasoani sili i taimi faigata.

2. E lē lelei le ola muimui.

3. E manuia le tagata e talitonu ma faamaoni i le Atua.

MANATU TAIALA O ME: O GALUEGA LELEI

E leai se tuaoi o galuega lelei, aua o lo o faia ma le atoatoa ina ia manuia ai fanau, o aiga le nuu ma le atunuu, ae sili ai le galuega a le Atua. Aua tatou te talitonu ma le faamaoni, o galuega lelei, e auala mai ai manuia o le Atua mo tatou.

ASO SA: 1 ME 2022

MATAUPU: O MARIA MA LE UU MANOGI

SINI: Ia a’oa’oina le fanau ina ia o latou iloa, o galuega lelei tatou te faia, e faamanuia mai ai le Atua ia i tatou.

TUSI FAITAU: Ioane 12: 1 – 3

FESOASOANI MO FAIAOGA:

Ina ua alu atu Iesu i Petania, e tusa lea toe ono aso ona fai lea o le paseka. Sa faia ai le faigaai e Maria ma Mareta ma lo la tuagane o Lasalo, lea sa faatuina e Iesu mai le oti. Na taoto faatasi Iesu ma Lasalo e aai, ao Maria ma Mareta ua la auauna atu ai. Ona tago ai lea o Maria i le uu nato tautele, ua ia u’u ai vae o Iesu, ma soloi foi i lona laulu. Ua sasala solo le manogi manaia o le uu i totonu o le fale. O le uu lenei tamaiti, o se uu e taugata. E telē se tupe e maua mai ai pe a faatau. Peitai ua le faatauina e Maria ina ia maua ai se tupe, ao lea ua ia uu ai vae o Iesu. O se galuega lelei ua faia e Maria mo Iesu.

Ioe tamaiti, o se galuega lelei sa faia ma le atoatoa e Maria, e faailoa ai lona talitonu ma le faamaoni, i le galuega faaola a Iesu. Aemaise ai, o Lasalo lo la tuagane, lea na toe faaola mai e Iesu mai le oti.

O lona uiga, o se galuega lelei ua faia e Maria, auā ua talitonu o ia, e faamanuia ai lo latou aiga e Iesu. Le fanau e, e taua tele lo tatou naunau e fai galuega lelei i totonu o aoga, o aiga, aemaise o nisi tagata, e oo i o tatou matua, auā e faamanuia mai ai le Atua ia i tatou.

UIGA O UPU

- i) faigaai - ‘aiga, talisuaga
- ii) uu nato tau tele - uu e manogi lelei ma taugata (anagata)

GALUEGA FAATINO:TALI MAI I LE SA’O POO LE SESE

1. O Lasalo o le tamā o Maria ma Mareta....(sese)
2. E alofa Maria ia Iesu.....(sao)
3. Na uu e Maria vae o Iesu i le apa vai.....(sese)
4. Sa auai faatasi Iesu ma ona soo i le fale o Maria, Mareta ma Lasalo.....(sao)

PESE: MARIA MA MARETA

O Iesu ua savali mai
 I Petania le aai
 Ma ona soo o loo mulimuli mai ai
 Ua latou afe ane
 I totonu o le fale
 O Maria ma Mareta lo la tuagane
 Peitai o Maria
 O ia lava na filifilia
 Se galuega lelei mo Iesu Mesia
 Le uu nato ua aumai
 O vae o Iesu ua uu ai
 Ma lona lauulu ua ia soloi ai.....Fati : O le aliao, makapisu ma le gau.

A'OA'OGA:

1. Tatou te maua manuia o le Atua mai i a tatou galuega lelei.
2. E manaomia lo tatou galulue faatasi e faatino galuega lelei.
3. E le fiafia le Atua i le tagata ola le faamaoni.

ASO SA: 8 ME 2022 (ASO SA O TINĀ)

MATAUPU: UA FAIA E LE ATUA LE FAFINE

SINI: Ia a'oa'oina le vasega ia malamalama, o le ivi asoaso o Atamu na faia ai e le Atua Eva.

TUSI FAITAU: Kenese 2: 21 – 23

FESOASOANI MO FAIAOGA:

O le tatou Mataupu i lenei aso, o lo o faamatalaina ai e le Tusi o Kenese le faia o le fafine. O lenei fuafuaga mamana a le Atua, o le atoaga lea o lana galuega foafoa mo le lalolagi, o le vanimonimo, o le sami, laau, o manu faatasi ai ma le tagata, o le tane ma le fafine.

Sa fetalai mai ai le Alii le Atua e faapea, “E le lelei ina toatasi o le tagata, ou te faia sona fesoasoani e tatau ma ia.” O le ala lena o lona toina mai o le tasi ivi asoaso o Atamu, ua na faia ai le fafine o Eva. Ua silasila atu le Atua, ua i ai le fesoasoani o Atamu, ma o le a avea i laua ma tausii mea o lana foafoaga.

Le fanau e, o le finagalo o le Atua, ia faia se fafine, ina ia la galulue faatasi, e fai galuega lelei. O le tamā ma le tinā, o lo laua tiute tauave, o le tausiiaina o fanau ma atia’e galuega lelei mo le manuia o aiga ma le Talalelei ia Iesu.

UIGA O UPU:

- i) faamoegaseina - moe vaivai
- ii) toina - aveese mai
- iii) faasoo - sosoo

GALUEGA FAATINO: FAATUMU AVANOA

Faatumu avanoa i upu nei?

(toina, Atamu, ivi asoaso, fafine.)

1. Na faamoegaseina e le Atua _____
2. Ua faia e le Atua le _____
3. O le _____ na faia ai le fafine
4. Na _____ e le Atua le ivi asoaso o Atamu

PESE: When we all work together, together, together
When we all work together, how happy will be

For your work is my work
And my work is God’s work
When we all work together
How happy will be
Afai tatou te galulue faatasi, faatasi, faatasi
Afai tatou te galulue faatasi, ona fiafia ai lea.

O la’u galuega o lau galuega
Tatou galulue mo le Atua
Afai tatou te galulue faatasi
Ona fiafia ai lea.

A’OA’OGA:

1. E mamana galuega a le Atua.
2. Ia tatou galulue faatasi
3. Ia tatou maua le loto fesoasoani.

ASO SA: 22 ME 2022

MATAUPU: E ALOFA IESU I TAMAITI

SINI: Ia a’oa’oina le fanau ina ia o tatou malamalama, e alofa Iesu ia te i latou, auā e faapei o i latou o e o i le malo o le lagi.

TUSI FAITAU: Mataio 17: 13 – 15

FESOASOANI MO FAIAOGA:

Ina ua aumai tamaiti ia Iesu, na Ia faamanuia i ai, ua faaee ona aao i luga ia te i latou ma tatalo. Peitai, na vavao atu ona so’o ia te i latou. E le o aumaia e Mataio le mafuaaga, na ala ai ona lē mananao le au so’o e faia e le Alii lea mea i tamaiti. E manatu faatauavaa so’o i tamaiti, ma e latou te le aloaia foi so latou sao i le sosaiete o Iutaia i ia ona. E taua tamaiti, ma e ao ona faataitai i ai le soifuaga o so o se Iutaia, ia faapei o tamaiti.

A o le fesili – Aisea na lē manao ai le Alii e vavao tamaiti, e omai ia te ia? A lea e manino lava lana saunoaga, tali atu ai i ona so’o, “Ina tuu mai ia o tamaiti e o mai ia te au, ‘aua le vaoia i latou, auā e faapei o i latou nei o e o i le malo o le lagi.” Se a le uiga o lea fetalaiga a le Alii?

Le fanau, o outou o tamaiti, o lo o atagia ai uiga lelei o le loto mamā. O le tasi lea uiga lelei o le tamaitiiti, o le loto mamā. Na te le o iloa ona tuua’i le leaga i le isi tagata, auā o la e laitiiti, e mamā lava lona mafaufau. Le ala lena o le fetalaiga a Iesu “Aua e faapei o i latou nei, o e o i le malo o le lagi.” Lea foi e taua i le lauga faa-amuia a Iesu i luga o le mauga (Mataio 5: 8) “Amuia e loto mama, aua latou te iloa atu le Atua.”

Uiga o Upu:

- | | | | |
|-----|-------|---|--------------------------|
| i) | faaee | - | tuu lima i luga o le ulu |
| ii) | vaoia | - | taofi. |

GALUEGA FAATINO: FAAFETAUI UPU

Faafetaui upu nei i o latou uiga?

1. Tamaiti taofi

- | | |
|------------|--------------------------|
| 2. Faaee | tautala |
| 3. Vaoia | fanau iti |
| 4. Fetalai | tutusa |
| 5. Faapei | tuu lima i luga o le ulu |

PESE: Iesu alofa i tamaiti
O tamaiti o le lalolagi
Enaena, samasama, uliuli, paepae
E alofa Iesu ia oe ma a'u

Jesu loves the little children
All the children of the world
Red and brown, black and white
They are precious in his sight
Jesus loves the little children of the world

A'OA'OGA:

1. O fanau ole meaalofa mai le Atua.
2. E faamaoni le alofa o Iesu i tamaiti.
3. Amuia e loto mama, aua latou te iloa atu le Atua.

ASO SA: 29 ME 2022

MATAUPU: UA OO MAI LE OGE

SINI: Ia a'oa'oina le vasega ina ia o latou iloa, o le oge, o lona uiga, ua leai ni meai ma ni vaiinu.

TUSI FAITAU: Kenese 41: 53 – 57 (Mo le Faiaoga)
Kenese 41 : 54 (Mo le Vasega)

FESOASOANI MO FAIAOGA:

A tatou faitau i le mataupu atoa lenei e 41, o lo o manino mai ai lava galuega lelei na faia e Iosefa ma Farao ma ona tagata. O le isi la lea galuega lelei na faia e Iosefa, o lona tapenaina lea o le malo o Aikupito, latou te galulue e faaputu saito ma teu, auā a oo mai le oge, a o la e tele meai e vaevae mo le nuu.

Lea la ua oo mai le oge, ina ua tuana'i atu tausaga e 7 na mau ai Aikupito, a ua leai se mea o faaletonu ai le nuu, auā na lava ma totoe saito sa faaputuina e faatau atu i le nuu. Ua le gata o Aikupito, ae faapea foi nuu uma, ua oo atu i ai le faasoa o saito, auā sa lava ma totoe.

Tamaiti, ua a'oa'o mai lenei tala mo tatou i lenei aso, e ao ona ola tapenapena ma sauniuni i taimi uma, auā a oo mai aso faigata, a'o o lo o tatou lava tapena ma sauni mo ni mea e tutupu mai. I le feagai ai o outou ma aoga, ia toaga e suesue i au meaaoga, auā a oo mai suega o le tausaga, a o la e sauni i tatou i fesili o le suega. O le feau taua mo tatou, ia ola tapena ma sauni, tapena le tagata atoa, tino, mafaufau ma le ola faaleagaga.

Uiga o Upu:

- | | | | |
|------|-----------|---|---------------------------|
| i) | mau | - | tele meaai/vaiinu/naumati |
| ii) | oge | - | leai ni meaai/vaiinu |
| iii) | velavela | - | malosi |
| iv) | matelaina | - | fia 'ai ma fia inu |

GALUEGA FAATINO:FAATUMU AVANOA

Faatumu avanoa i upu nei:
(mau, fitu, oge, Iosefa, Aikupito, nuu)

Ua mavae foi le fitu o tausaga _____ na i le nuu o Aikupito. Ona amata ai lea ona oo mai o tausaga e _____ o le _____, faapei ona fai atu ai o _____, ua i ai foi le oge i _____ uma, a o le nuu uma o _____ sa i ai mea e 'ai.

PESE: O Iosefa
 Ua na faia le vavega
 Ua na lavea'i mai
 Aikupito i le fia aai
 Ua tele meaai
 I saito ua faaputu mai
 O le Atua, o Ia ua na fai mai (fati: Ataata lava, ma faafiafia lou loto)

A'OA'OGA:

1. Ia sauniuni mo aso faigata.
2. E le mafai ona tuulafoa'iina i tatou e le Atua.
3. E leai se mea lelei e maua ma se filemu.

MANATU TAIALA O IUNI: E SILISILI ESE LE ATUA

O le Atua lava ia e silisili ese ma tulaga ese lona mamalu. E ifo ma tapuai i ai le lalolagi uma lava. Ua tatou talitonu foi, ua na'o le Atua lava e tatou te maua ai le malosi ma le manuia i lo tatou ola.

ASO SA: 5 IUNI 2022

MATAUPU: KONELIO LE TAITAI O LE TOASELAU

SINI: Ia malamalama le vasega, o Konelio o se taitai e talitonu ma faatuatua i le Atua.

TUSI FAITAU: Galuega 19: 1 – 9 (Mo le Vasega)
Galuega 19: 1 – 4 (Mo le Faiaoga)

FESOASOANI MO FAIAOGA:

O Konelio o se tagata mai le nuu o Kaisareia. O ia o se tagata na filifilia e fai ma taitai o le toaselau, i le au tau e igoa, o le au tau a Italia. O Konelio la, o se taitai e ola mata’u i le Atua. E amio Atua foi, e le gata o ia, a ua faapea foi ona mulimuli i ai ma lona aiga. O le masani a lenei taitai, e fiafia e loto fesoasoani i lona nuu, e ala i meaalofa. E fiafia foi e mafuta i le Atua i le ola tatalo e le aunoa.

I se tasi aso, ua ia iloa ai se fa’aaliga, pe tusa lea o le itula e tolu (3) i le afiafi. Ae manatua foi tamaiti o le mea lea e ta’u o le fa’aaliga, e mafai ona toe faaupu faapea. O se feau o lo o finagalo ai le Atua, ae o lo o faailoa mai e se isi, ia po o agelu ia te oe.

Fai mai la tamaiti, ua faateia a Konelio i le ulufale atu o le agelu, ma faapea atu; Konelio e, *(pause o se avanoa e fesili ai i tamaiti, po o a ni lagona pea faateia i latou i le mea ua tupu)*. E mafai ona faapea mai tamaiti, e fefefe, popole. E tatou te fefefe ma popole. E faapena lagona tamaiti na oo ia Konelio. Ua fefe ma popole po o le a lenei mea ua tupu, ma ua pulato’a i le agelu. “Konelio e, :Ua o ae au tatalo ma au meaalofa o fai ma faamanatu i luma o le Atua” (f.4). O lona uiga tamaiti, fai mai le agelu, Konelio, ua faafogaina e le Atua ma ua tali foi le Atua i au tatalo.

Ese le manaia o le fa’aaliga na iloa e Konelio a tamaiti? Ia o se feau foi lea mo i tatou le fanau. Ia o tatou manatua, o le ola talitonu ma faatuatua i le Atua, e ala i le tatalo usiusitai i matua, toaaga i le Aoga Aso Sa, faalogo i le faiaoga Aso Sa. Ia alofa i se o manaomia lau fesoasoani. Ia faatasi ai ma ia toaga e tatalo ma mafuta ma le Atua.

E manuia ma tali mai ai le Atua i o tatou manao. E manuia ai oe ma lou aiga atoa. Ia o le tatou mataupu na tamaiti, ae ia manuia tele outou le fanau i lenei Aso Sa.

Uiga o Upu

- i) mata’u - ava, usitai
- ii) fa’aaliga - o se feau ma faailoa mai e se isi ia te oe.

- iii) ulufale - alu i totonu o le fale.
- iv) pulato'a - le emo mata, sioa
- v) faamanatuga - e faamanatu mai/faamanatu ai.

GALUEGA FAATINO: Taliga Fesili

1. O ai Konelio?

Tali: O le Taitai o le toaselau

2. O fea e sau ai Konelio?

Tali: O Kaisareia

3. O ai le igoa o le au tau a Konelio?

Tali: O au a Italia.

PESE: 1. O Konelio, o Konelio, o Konelio
O se taitai 'au lelei
O Konelio, o Konelio, o Konelio
E faatuatua ma tino lelei.

Tali: E leai o se mea e popole ai
O le Atua o lo o auai mai
La te faatasi pea ma Ia
I taimi uma o lana taitaiga (tune: Sili oe, sili oe Iesu)

A'OA'OGA:

- 1. Ia faatuatua ma faamoemoe i le Atua.
- 2. Ia mafuta i le Atua i taimi uma
- 3. Ia ola tatalo e manuia ai

ASO SA: 12 IUNI 2022

MATAUPU: UA TATALAINA LE ATO KOME

SINI: Ia malamalama le vasega i le auala na faasaoina ai Mose.

TUSI FAITAU: Esoto 2: 3 – 6

FESOASOANI MO FAIAOGA:

O le tala tamaiti sa tatou faitauina, o le tala i le faasaoina o le ola o Mose, e fa'aaoga ai le ato kome. Manatua foi tamaiti o le ato kome, o le ato lea sa tuu i ai e le tinā o Mose, ia Mose i totonu ae faatafea i le vaitafe.

Ina ua fanau mai Mose sa nanā pe na faalafi e lona tinā mo le tolu masina. Ona o se tama ua matua'i iloa lona lalelei. Ua alofa tele le tinā o Mose ia Mose ona ia faia ai lea o se ato kome e foliga e faaofuofu e fai lona tapuni. Ua ia avane foi le pulu emeri ma le pulu safeta ua fai faalelei ai le ato ina ia malu puipua ma saogalemu Mose. O le pulu emeri ma le pulu safeta. O ni mea faitino e tele ina fa'aaoga e tagata e pupuni ai ni pūpū, pe fonofono ai mea faaletonu o lo o manaomia le fia faaleleia. O mea la ia o lea na fa'aoga e le tinā o Mose e faaleleia ai pe pupuni ai pūpū o le ato kome ina ia 'aua nei sao se vai i totonu o le ato kome lea o le a tuu i ai Mose.

Fai mai la le tala tamaiti. Na uma loa ona fai o le ato ona tuu loa lea i ai ma Mose ma faatafea loa i le vaitafe. Ina nei maua mai o ia e auauna a Farao ona fasioti lea. A o tafetafea atu la Mose i le vaitafe o i le vao utuutu, na tafea sa'o i le vaega lea e masani ona taele ai le afafine o Farao. A o lea lava e taumulimuli i ai le vaai a lona tuafafine pe faamata e taunuu manuia lana tafetafea.

Na maua e auauna a le afafine o Farao le ato kome, ona avane lea o le ato i le afafine o Farao ona ia tatala lea, ae faateia le afafine o Farao i le tatalaina a'e o le ato ae iloa ai le tama o lo o tagi, ona alofa ai lea o ia i le tama. Ua iloa foi e le afafine o Farao o le tama lea, o le tama a se tasi o le nuu o le Atua.

Ona sau ai lea ia te ia o le tuafafine o Mose lea sa mulimuli ma lafilafi mamao mai, e vaai lona tuagane. Ua fai atu ia te ia. O le a alu e vaai mai se fafine failelei e sau e fafaga ia te ia. Ona talia lea e le afafine o o Farao lea tala. Ona alu ai lea o le tuafafine o Mose ma aumai le la tinā ma tausī ma fafaga ia te ia.

Tatou manatupu na tamaiti i lenei taeao. O le ato kome o le ato lea na tuu i ai totonu e le tinā o Mose ia Mose. Ona faatafea lea ina ia faasaoina mai lona ola mai le fasiotia e auauna a Farao. Ua tatou a'oa'oina mai ai foi i le tala lenei tamaiti, o a faafitauli ma faigata e feagai ma i tatou. E faatasi mai pea le Atua e faasaoina ma lavea'i i tatou.

GALUEGA FAATINO: TaligaFesili

1. Aisea na tuu ai Mose i le ato kome?

Tali: Ina ia faasaoina.

2. O a mea na pupuni ai le ato kome?

Tali: O le pulu emeri ma e pulu safeta.

3. O ai na ia maua ia le ato kome i le vaitafe?

Tali: O le afafine o Farao ma lana galu teine.

4. O ai Farao?

Tali: O le tupu o Aikupito.

PESE: Le tama o Mose, x 2

Ua faatafea

E lona aiga x 2

Ina ia lavea'iina

Ua alofagia x 2

Le agaga o le Atua

Afafine o Farao x 2

Lona ola ua faasao (fati: daddy finer)

A'O'OGA:

1. E lavea'i tatou e le Atua..

2. E faatasi mai le Atua i taimi uma.

3. Alofa i tamaiti uma.

ASO SA: 19 IUNI 2022

MATAUPU: UA TEA LE MA'I VEVELA

SINI: Ia malamalama le vasega o Iesu ns mslolo ai le ma'i vevela.

TUSI FAITAU: Luka 4: 38 – 39

FESOASOANI MO FAIAOGA:

O le ma'i vevela tamaiti, o le ma'i lea e ta'ua e tatou o le fiva. Fai mai la le tala sa faitauina. O lea ua tuua pe ua alu ese mai Iesu mai le falesa, ia po o le malumalu. Auā la tamati, o le masani lava lea a Iesu. E fiafia e alu i le falesa e tatalo, ma a'oa'o atu i tagata. O lea la ua alu ese mai o

Ia mai le falesa, ae alu i le fale o Simona. Ina ua alu atu Iesu i totonu o le fale, na Ia iloa ai ma vaaia le tinā o le toalua o Simona, o lo o ma'i tigma i le ma'i vevela.

Ua fai ane foi tagata sa latou i ai lea aso, "Iesu! Ia e alofagia o ia. Ua tigma lava o ia i lenei ma'i." Fai mai la tamaiti, e le'i toe faatali Iesu, ae ua Ia tago atu ma tuli ese le ma'i vevela mai le tinā o le toalua o Simona, ona malolo ai lea o ia.

Tou te iloa la tamaiti le mea manaia, ua faia e le tinā nei ua faamalolo? Fai mai na ia tula'i i luga ma amata loa ona auauna ia Iesu. Ese le manaia o le tali a lenei tinā i le alofa o Iesu a? Ua ia tali i le toe ofo atu o lona ola e auauna ai ia te Ia.

Ia o le tatou tala na tamaiti. A o se a'oa'oga taua foi lea mo tatou ua tatou maua mai le tala. O Iesu e malolo ai so o se ma'i tatou te maua ai. Pau le mea e manao ai Iesu ia i tatou, ia tatou tatalo ma faatoga atu ia te Ia pe a tatou manaomia lana fesoasoani. Auā o le mea mautinoa lava ia. Ua leva ona iloa e Iesu o tatou manaoga. Ae e fia faafofoga Iesu i o tatou leo pe o tatou saili atu ia te Ia ma le faamaoni.

Uiga o Upu

Vavao : tuli ese

GALUEGA FAATINO: Taliga Fesili

1. O le a le ma'i o lo o ta'ua i le tala?

Tali: O le ma'i vevela.

2. O ai le na maua i e ma'i vevela?

Tali: O le tinā o le ava Simona.

3. E faafefea ona te'a le ma'i vevela?

Tali: Ua vavao e Iesu.

PESE: LIMA O IESU

O lima o Iesu

O lima agalelei

E alofa i tagata uma

E faamalolo i tagata mama'i, ma faamanuia i ai.

O nai ona lima e auauna

E tali i lau valaau

O lima o Iesu, o lima agalelei

E alofa ai i tagata uma

A'OA'OGA:

1. O Iesu o le foma'i sili.
2. Saili ia Iesu mo se fesoasoani.
3. E alofa Iesu i tagata uma.

ASO SA: 26 IUNI 2022

MATAUPU: UA PA'Ū TAKONO

SINI: Ia malamalama le vasega, o le pau o Takono na mafua mai i le Atua.

TUSI FAITAU: 1 Samuelu 5: 1 – 4

FESOASOANI MO FAIAOGA:

O Takono tamaiti, o se atua e leai se ola, ia po o se atua mate. A o le atua lea sa tapuai ma auauna ai tagata Filisitia. O atua e foliga o ni faatagata e le mafai ona minoi, seiloga e faaminoi e se tagata.

A o le atolaau, o le faailoga o le faatasi o le Atua Soifua i lona nuu o Isaraelu. Po o fea lava la e o ai Isaraelu, e o lava ma ave. I le tala la lea sa faitauina, ua tatou iloa ai e le feagai le mamalu o le Atua Soifua ma ni atua mamate.

Fai mai le tatou mataupu. Ua ave e Filisitia le atolaau a le Atua ma faatu i tafatafa o Takono. Ae na mafua ona o ma Filistia le atolaau, ona ua faiaina ma toilalo Isaraelu i le taua ma Filisitia. Ona o loa lea o Filisitia ma ave i le fale o Takono ma faatu ai i tafatafa o Takono.

Fai mai le tala tamaiti, ua usu atu tagata Asetota, o le isi pitonuu lea o Filisitia. Ua latou iloa ai ua pa'ū i lalo Takono, ua fao i le eleele, i luma o le atolaau a le Alii. Ona latou fetagofi lea ma faatu i luga.

Peitai tamaiti, fai mai ua toe usu atu foi tagata Asetoto i le isi taeao na sosoo ai, ua tulaga ese le mea lea ua tupu mai ia Takono. E le gata o le toe pa'u fao i le eleele ae ua motu ese foi ma le ulu, faatasi ai ma ona tapulima uma e lua, ae totoe ai na o le tino.

Tamaiti, o i lea tatou te iloa ai, le ofoofogia ma le silisili ese o le Atua Soifua. O le paia ma le mamalu o le Atua e lē feagai ma ni atua mamate. A o se a’oa’oga foi lea mo Filisitia. O le latou avea o se mea e patino i le Atua, o le feagai foi na ma puapauga ma faafitauli.

O le a’oa’oga taua foi lea mo i tatou le fanau. ‘Aua tatou te avea se mea totino a se isi tamaitiiti, ona e maua ai tatou i faafitauli. Ae le gata i lea, tatou te fiu lava e fa’aaoga e leai ma se meaaoga tatou te maua mai ai. O lou tago vale foi, e le fiafia ai le Atua ia i tatou.

GALUEGA FAATINO: Sailig uiga o upu.

1.	Asetoto	←	-	→	faailoga o le faatasi mai o le Atua
2.	Takono	←	-	→	leai po o le motusi
3.	atolaau	←	-	→	pitonuu o Filisitia
4.	tafatafa	←	-	→	atua mate
5.	motu	←	-	→	itu taumatau po o le itu tauagavale

PESE: O LE ATUA E TELE

O le Atua e tele, malosi ofoofogia
 E leai se mea e le mafai ona ia faia
 Na ia faia o atumauga
 Na ia faia o vaitafe
 Ona foliga ua vaaia i le lalolagi HA! HA!

My God is so big, so strong and so mighty
 There’s nothing my God cannot do,
 FOR YOU

A’OA’OGA:

1. ‘Aua le manao fua i meatotino a le isi tamaitiiti.
2. ‘Aua e te gaoi.
3. E silisili ese le mamalu o le Atua.

MANATU TAIALA O IULAI: OLA TATALO

O le tatalo o se auupega sili lea ona malosi e fesootai atu ai i le Atua i manatu o le au kerisiano. Le ala lea tatou te toaaga ai pea e tatalo. Ia tatalo e le aunoa, ae aua tatou te fiu e tatalo. O le ola tatalo e le aunoa, o lo tatou manatua lava lea o le Atua i taimi uma.

ASO SA: 3 IULAI 2022

MATAUPU: E LEI FEFÉ TANIÉLU E TATALO

SINI: Ia malamalama le vasega, o le tatalo e fesootai ai le tagata i le Atua.

TUSI FAITAU: Tanielu 6: 7 – 10 (Mo le Faiaoga)
Tanielu 6: 10 (Mo le Vasega)

FESOASOANI MO FAIAOGA:

O le tatalo o le auala lea e fesootai atu ai tatou i le Atua. O a uma mea tatou te mananao i ai, o a foi faafitauli e feagai ma i tatou. O le tatalo lava tatou te saili fesoasoai ai i le Atua.

E faapea le mea lea o lo o tupu i totonu o le tala lea sa tatou faitauina. O lo o ta’ua i le mataupu lea tamaiti. O lea ua filifili alii silisili o le malo o Peresia, o faipule, o alii sili, o tulafale ma pulenuu, ina ia latou faia se tulafono e faasa ai se tasi ona tatalo ma faatoga i se isi atua e ese mai le tupu o Tariu.

Ae manatua foi la tatou tamaiti, o nei faiga uma ma nei tau pulepulega leaga uma. O ni togafiti ma se faiga e lamalama ai e nei tagata Tanielu. Aua o Tanielu tamaiti, o se tagata e atamai tele, o Tanielu foi na finagalo le tupu o Tariu; o le a avea ma pule i le malo uma. O i tonu a la tamaiti, na tupu a’e ai lagona tiga i alii sili, o faipule ma isi tagata maualuluga o le malo e fau se togafiti e faasalaina ai Tanielu.

Lea la e i ai le tatou mataupu i lenei taeao. O togafiti leaga, a alii sili, faipule ma i latou uma nei, ina ia faasalaina ai Tanielu. Aua o lea lava latou te iloa o Tanielu o le tagata e talitonu ma faatuatua i le Atua ma e toaga foi e tatalo. Fai mai la, e tiga lava nei faiga tau faafefe a ia tagata. E lei fefe pe solomuli ai le ola tatalo o Tanielu i le Atua. Na maua lava lona lototele ma lona ola talitonu i le Atua, na te lavea’iina o ia.

Ia o le tatou mataupu na tamaiti. Ua toe faamanatu mai ai ia i tatou le fanau. O a faafitauli e feagai ma i tatou, ia tatou tatalo i le Atua ma le loto talitonu. A feagai foi tatou ma ma’i o le tino, tatalo i le Atua e foai mai le malosi. Ae aua foi nei galo tamaiti, tatou te tatalo faatoese i le Atua ona o tatou o se fanau le usiusitai i matua, augatatā e fai meaaoga, ia ma lo tatou ola faamisa i isi tamaiti, tatalo e faamagalō i tatou. Ia tatou tatalo foi e faamanuia i o tatou matua, mo le tausiga o tatou, faamanuia foi i o tatou uso, tuagane, tuafafine. Manuia tele outou le fanau

Uiga o Upu

- i) tulafale - o le matai fai upu o se nuu/faia tonu
 ii) faatoga - tauanau ina ia tali se manaoga
 iii) vavao - o sa, faasa, e le faatagaina
 iv) faamauina - faia (faia o se tulafono)

GALUEGA FAATINO: PASO

Saili mai upu nei i totonu o le paso?

Peresia, Tanielu, Tatalo, Tariu, Faatuatua

P	A	T	A	T	A	L	O	E	S
U	E	T	A	N	I	E	L	U	A
I	O	R	P	K	L	E	T	N	M
E	O	T	E		S	L	U	T	P
S	P	U	S	S	E	P	I	F	O
A	E	T	A	R	I	U	O	G	L
V	T	I	R		L	A	P	V	U

PESE: Pe na faia sau tatalo
 I le taeao nei
 I le suafa o Keriso
 Na e valaau mo Ia
 Ia puipui mai

E ua maua le tatalo
 E liliu ai foi au
 Pe a mafatia le loto
 I le taeao nei....

A'OA'OGA:

1. Toaga e tatalo.
2. E faafofoga le Atua i lau tatalo.
3. Ia pei o Tanielu, le lototele e tatalo.

ASO SA: 10 IULAI 2022

MATAUPU: UA A’OA’O IESU I LE TATALO

SINI: Ia malamalama le vasega, e mafai ona a’oa’o e le isi tamaitiiti le isi tamaitiiti le ola tatalo.

TUSI FAITAU: Luka 11: 1 – 4

FESOASOANI MO FAIAOGA:

O le tatalo tamaiti o le tasi lea vaega taua o fesoasoani tele i le galuega tala’i a Iesu i le lalolagi. O taimi uma lava e sauni ai Iesu e amata ana a’oa’oga ma ana vavega i le motu o tagata. E muamua lava ona tatalo Iesu i lona Tamā e fesoasoani mai ia te Ia.

Pei foi la ona tatou vaai i la tatou mataupu lea sa faitauina. Sa i ai Iesu i le tasi nofoaga, sa ia tatalo ai. Ua uma la ona ia tatalo ae fai ane loa i ai ma le isi o lona au so’o. “Le Alii e, ia e a’oa’o mai ia te i matou i le tatalo, e faapei o Ioane foi ona a’oa’o i ona so’o”

Ese le manaia o le aioi lea e manano ai so’o o Iesu a tamaiti? Lea ua fai ia Iesu, e a’oa’o mai i latou e tatalo. A o le galuega foi lea tamaiti o lea sa fai e Ioane le papatiso i ona so’o, po o tagata ia e galulue faatsi ma Ioane i le tala’iina o le Talalelei.

Ia fai mai na fetalai atu loa ma Iesu ia te i latou. “Pe a outou tatalo, ia outou fai atu.”

“Le Tama e

Ia paia lou suafa

Ia oo mai lou malo

Ia e foai mai ia te i matou i le aso ma lea aso a matou mea e ai e tatau ma le aso

Ia e faamagalo ia te i matou, i a matou agasala

Aua foi matou te faamagaloina atu i ai latou uma o e agaleaga mai ia te i matou

Aua foi e te taitaiina matou i faaososoga”

Ia o le tatalo na tamaiti na a’oa’oina ai so’o o Iesu, lea foi ua tatou fa’aaogaina i le tele o taimi. O le tatalo lava lea e muamua lava a’oa’oina ai i tatou ia o tatou iloa ona tatalo. A tatou iloa foi la tatalo ia ona tatou a’oa’oina ai foi lea o isi tamaiti ma tatou iloa ona tatalo.

GALUEGA FAATINO: TUSITUSIGA

- Tapena e lau susuga ni (A4 paper) e tufa i tamaiti, e latou te tusia mai ai le tatalo o le Alii. O le taua o le galuega faatino, aua e ese lava le lelei o le taulotoina, ae e i ai foi ni sasi laiti e vaaia pe a tusi i lalo le tatalo o le Alii.
- Tofi se tamaitiiti e fai le tatalo a le Alii

PESE: TATALO

O le tatalo, o le tatalo a le Alii
Ia aoao uma ai tamaiti
O le tatalo, o le tatalo a le Alii
Ia aoao uma ai tamaiti

Ia faamanatu i ai latou
Le taua o lea tatalo
O le tatalo, o le tatalo a le Alii
Ia aoao uma ai tamaiti.....(Fati: Tulei ese, tulei ese..)

A'OA'OGA:

1. Ia ola tatalo.
2. A'oa'o le tatalo i isi tamaiti.
3. Mafuta i le Atua i le tatalo.

ASO SA: 17 IULAI 2022

MATAUPU: UA OTI ELI

SINI: Ia malamalama le vasega, so o se faamoemoe e aunoa ma le Atua, e lē i'u manuia.

TUSI FAITAU: 1 Samuelu 4: 12 – 18 (Mo le Faiaoga)
1 Samuelu 4: 18 (Mo le Vasega)

FESOASOANI MO FAIAOGA:

O le tala lea sa tatou faitauina o le maliu po o le oti o Eli le ositaulaga sili. A tatou vaavaai i le mafuaaga o le oti o Eli, na mafua mai i le taua i le va o Isaraelu ma Filisitia. O le mea na tupu, ua faasolo ina solomuli ma faiaina Isaraelu i le taua. Ua toatele foi Isaraelu ua sosola i luma o

Filisitia, ma ua tele ina fasia uma le nuu. Ae le gata i lea, ua maliliu ai foi ma atalii e toalua o Eli sa o ai i le taua lea; O le atolaau foi a le Atua ua avea foi.

O tulaga uiga ese lea ua oo i ai le nuu o le Atua. Ae i le taimi o le taua, e toatasi lava le tagata Peniamina na momo'e ma sola ese mai le taua. O lenei tagata na ia faailoa ia Isaraelu ma le toeaina o Eli le mea ua oo i ai le nuu.

Ua alu ane lenei tagata ma faailoa atu i le nuu, Ona alalaga ai lea o tagata uma o le nuu, ona o lenei tala ua latou maua. Ua oo foi le alalaga a tagata i taliga o Eli, ona fesili ai lea o Eli po o le a le la alalaga. Atonu sa manatu Eli o se alalaga, ona o se tala fiafia mai le taua. Peitai leai, o le alalaga na o se auega ona o le tulaga faaletonu ua i ai Isaraelu.

Ao tietie ai Eli i le nofoa i le itu ala, o lo o faatalitali ai le foi mai o le taua. Na faateia o ia i le tala na avatu ina ua avea le atolaau, ma ua faiaina Isaraelu. Ua feoti foi ona atalii e toa lua. Ona pa'u ai lea o ia i tua nai luga o le nofoa i tafatafa o le faitotoa, ua gau lona ua, ua oti ai, auā o le toeaina, ua mamafa foi o ia. O se aoaoga mo tatou le fanau – Aua tatou te faia ni amio e le lelei, leaga e aafia ai lagona o o tatou matua.

GALUEGA FAATINO: Taliga Fesili

1. O le a le mafuaaga o le oti o Eli?

Tali: Ona ua faiaina Isaraelu ma maliliu ona atalii.

2. O ai na tau ma Isaraelu?

Tali: O Filisitia.

3. E faafefea ona oti Eli?

Tali: Pau i le nofoa na nofo ai.

Ua gau le ua ina ua pa'u

PESE: IVE GOT PEACE LIKE A RIVER

I've got peace like a river

I've got peace like a river

I've got peace like a river

In my soul (x2)

Ive got joy like a river

In my soul

Ive got the love like a river

In my soul

Ive got peace, joy, love like a river
In my soul

A'OA'OGA:

1. Mafuta i le Atua e manuia ai se faamoemoe.
2. O le Atua le taitai au.
3. Ua oti Eli, ona o le alofa i le nuu ma ona atalii.

ASO SA: 24 IULAI 2022

MATAUPU: UA ULUFALE IESU I LE MALUMALU

SINI: Ia malamalama le vasega, o le malumalu o le fale o le Atua, e le o se fale e faatau ai ni oloa.

TUSI FAITAU: Mataio 21: 12 – 13

FESOASOANI MO FAIAOGA:

O le malumalu lava ia tamaiti, o le falesa. O le fale tatalo, o le fale e fai ai tapuaiga i le Atua. E le o se fale'ai po o se falesiva, ia po o se fale foi e faatau ai ni oloa. Ma o le fale e talitonu tatou uma lava o le fale e afio ai le Atua. O le fale e paia, e mamalu, auā e paia ma mamalu foi le Atua.

O le tala sa tatou faitauina tamaiti. O lea ua oo atu le malaga faatupu a Iesu i Ierusalem. Le mea tonu lava lea o lo o i ai le malumalu tapuai o tagata faatuatua. Ua ulufale atu o Ia i totonu o le malumalu, ma ia vaaia ai le lē fetau o mea o lo o faia i totonu o le malumalu. Ua fai ma nofoaga e faatau ai oloa a tagata.

O i la na lagona ai le lē fiafia o Iesu i ia ituaiga faatinoga. Ona ia tulia uma lea i fafo e na fefaataua'i i le malumalu, ua Ia fuli i lalo laulau a e na su'e tupe, ma nofoa a e na faatau tupe. Ona ia faapea atu lea ia i latou, "Ua tusia, E taua lo'u fale, o le fale tatalo, a ua faia e outou ma ana o e fao mea." O le uiga o fetalaiga a Iesu tamaiti. O lona fale po o le malumalu o le fale mo tapuaiga i le Atua. E le o se faleoloa po o se fale tupe.

O se a'oa'oga foi lea mo i tatou le fanau. O le falesa, o le fale tatalo, ae le o se fale taalo, a ea? Auā o le toatele o tatou tamaiti, e omai loa i le falesa e le o i ai le faifeau ma lona faletua, pe leai foi se faiaoga Aso Sa, ona taaalo loa lea ma ulavavale ai. O lea le fanau, a e sau i le falesa, ia e ava, ma fa'aaloalo i le Atua, auā o le falesa o le fale e afio ai le Atua.

GALUEGA FAATINO: Faafetaui Upu

- | | | | |
|----|-------------|---|--------------------------|
| 1. | malumalu | - | tulei i lalo |
| 2. | ulufale | - | fale tatalo, falesa |
| 3. | fefaataua'i | - | tutuli |
| 4. | tulia | - | ulu atu, alu i totonu |
| 5. | fuli i lalo | - | faatau atu ma faatau mai |

PESE:

Ou te fia alu, i le falesa	}	x 2
E vivii ma tatalo i le Tama		
Ou te fia allu i le falesa		
E mafuta ma feiloai ma lou tama		
A o satani e faaososo mai		
E faamisi lou alu i le falesa		
Ou te tulia, tulia mamao ese		

E pule le Atua ia te a'u. (tautala)

A'OA'OGA:

1. O le falesa, o le fale o le Atua.
2. E le o se fale taaalo le falesa.
3. Ia fa'aaloalo i le Atua, pe alu i le falesa.

ASO SA: 31 IULAI 2022

MATAUPU: O ATALII O SAMUELU

SINI: Ia malamalama le vasega, a lelei le fanau ua ta'uleleia le tama, ae a leaga ua ta'uvalea le tama.

TUSI FAITAU: 1 Samuelu 8: 1-5 (Mo le Faiaoga)
1Samuelu 8:1,2 (Mo le Vasega)

FESOASOANI MO FAIAOGA:

O le tala lea sa faitauina tamaiti, o le tama ia Samuelu ma ona atalii e toalua. O le mea ua tupu, ua toeaina ia Samuelu; ao le faalavelave, o lana fanau nei e toalua o Ioelu ma Avia. O se fanau e tumu i le leaga. Sa fai i laua ma faamasino i le nuu e igoa ia Peresepa. O le faaletonu o le taitaiina a nei tama e toalua; ua le savavali i ala na mua'i savali ma usitai ai lo la tama.

A ua o la mananao i le oloa, ma o la tali foi i mea alofa ma faapiopio i le faamasinoga. O lea na avea ma mafuaaga o le le fiafia ai o toelaiina o le nuu o le Atua; ma o latou fai atu loa ia Samuelu ina ia tofia se tupu mo latou. Aua ua le lelei le tali mai a ona atalii.

Ao le tasi nei o faatinoga e masani ai nuu tuaoi o Isaraelu. E i ai o latou tupu. Peitai o Isaraelu e tasi lava lo latou tupu ua na o le Atua soifua. O i le mafuaaga na le fiafia ai le toeaina o Samuelu, na ia fesili ai loa i le Atua po o le a le mea o le a fai. Peitai na fetalai manino le Atua, e fai le mea la e mananao i ai le nuu. Aua e le o Samuelu ua te'ena e Isaraelu, ao le Atua ua fultua i ai Isaraelu. Ao le feau foi lea mo i tatou le fanau. O le mea mautinoa lava ia, e leai se tamā e manao e faaletonu ma inosia lana fanau e tagata. Aua la o fanau uma, o le āu o matua. E latou te alolofa ma tasi faapelepele, ma le faamoemoe e manuia ai le aiga i se taimi o i luma.

E faapena foi tatou le fanau. E leai lava se fanau e mananao e ta'uvalea o latou matua ona o i latou. E tatou te mananao uma lava, ina ia alofagia ma amanaia o tatou matua ona o i tatou. O le faaletonu lea o Ioelu ma Avia; ua ta'uvalea lo la tama ona o laua faatinoga. Aua a faaletonu le fanau, e tuufesili lava tagata poo se atalii a ai, poo se afafine a ai. Ae a amio lelei ma amio pulea le fanau, e tauleleia foi matua ma amanaia i laua i totonu o le nuu.

GALUEGA FAATINO: TALIGA FESILI

O ai igoa o le fanau a Samuelu?

Tali: Ioelu ma Avia

Aisea ua le fiafia ai toelaiina o Isaraelu?


Tali: Ona ua le savavali le fanau a Samuelu, i ala o le Atua.

O le a le manao o Isaraelu?

Tali: E tofia se tupu mo i latou.

PESE: O SAMUELU

O Samuelu, o Samuelu, auauna a le Atua
E faamaoni, e faamaoni e alofa i le Atua.



O ona atalii, o ona atalii X2
 O Ioelu ma Avia
 Ua agasala, ua agasala ma ua faalumaina.....*Fati: O Iosefa, O Iosefa loto alofa...*)

AOAOGA:

1. Ia savavali i ala o le Atua.
2. Fai mea sili ma lelei.
3. ‘Aua le mananao i le oa a lenei lalolagi.

MANATU TAIALA O AOKUSO: ALOFA I ISI TAGATA

O le tulafono sili lava lea a Iesu ua na a’oa’o mai ia te i tatou, o le ALOFA. Ia alofa i le Alii ma lou loto atoa, o lou malosi, o ou manatu atoa ma ia e alofa atu i ou tuaoi, ia pei o oe lava ia te oe. Tamaiti, o le alofa i isi tagata, o le finagalo lava lea o le Atua mo tatou, auā tatou te maua ai le fealofani ma le nonofo faatasi, ae sili ai ona fiafia mai o le Atua ia i tatou.

ASO SA: 7 AOKUSO 2022

MATAUPU: O LE FAFINE SAMARIA NA ALU E UTU VAI

SINI: Ia a’oa’oina le vasega, o lima foai i isi tagata, tatou te maua ai manuia o le Atua.

TUSI FAITAU: Ioane 4: 7 - 9

FESOASOANI MO FAIAOGA:

E ese le matagofie o lenei tala, i le talanoaga a Iesu ma le fafine Samaria. O le feiloaiga a Iesu ma lenei fafine, tatou te iloa ai le le malamalama o si nei tinā i le galuega faaola a le Alii.

O le augani atu o Iesu i se vai, ma le tali mai a lenei fafine e faapea “Pe faapefea ona e fai mai i se mea inu ia te a’u, o le fafine o Samaria a o oe o le Iutaia, auā e leai ni mea e feavea’i a Iutaia ma Samaria,” O i tatou te iloa ai, e leai se alofa i lenei tinā. Ua manatu to’atasi lava ia ia te ia, a ua le faasoa atu se vai mo Iesu. A ua tatou iloa ai foi, e le iloa e lenei tinā, o le vai o lo o iā Iesu, o le vai ola e puna pea i aso uma e le mafai ona uma, ma e le toe lagona ai foi se fia inu.

Ioe le fanau, o le feau ua fia momoli mai mo i tatou mai lenei tala, e taua le ola fefaasoa’i ma agalelei atu i isi tagata o lo o fia maua se fesoasoani. E le gata i lea, o lou alofa iā Iesu, ma lou foa’i atu o se meaai, po o se tupe, po o le a lava se mea ina ia fiafia ai le isi tagata, ona faamanuia mai lea o Iesu mo tatou, e ala i ona manuia tatou te maua pea i aso uma. O le alofa o Iesu e le faatuaolia, o lo o matala mai pea lona faitotoa mo tagata uma e fia ulufale atu i lona fale.

GALUEGA FAATINO:TUSITUSIGA

Tusi mai upu faafeagai o upu nei

1. Fafine
2. Alofa
3. Sau
4. aumai

PESE: FA'AUTA FA'AUTA

Faauta, faauta ou te tu i le faitotoa

Ma ou tu'itu'i atu

Po o iai se tasi e faalogo i lou leo

Po iai se tasi e faalogo i lou leo

Ou te tatala, tatala, tatala le faitotoa

E te ulufale mai iai

BEHOLD! BEHOLD!

Behold, behold, I stand at the door and knock, knock, knock

Behold, behold, I stand at the door and knock, knock, knock

If any girl hears my voice, if any boy hears my voice

And I will open, open, open the door, I will come inside

A'OA'OGA:

1. Ia tatou alolofa i isi tagata.
2. Tatou foai mea lelei mo Iesu.
3. Aua le aiū

ASO SA: 14 AOKUSO 2022 (ASO SA O TAMĀ)

MATAUPU: UA USITAI APERAAMO I LE ATUA

SINI: Ia a'oa'oina le vasega ina ia malamalama, o Aperaaamo, o se tagata e usitai ma ava i le Atua.

TUSI FAITAU: Kenese 22: 1 – 3

FESOASOANI MO FAIAOGA:

Tamaiti, tatou te faalogo loa ia Aperaaamo, e tasi lava le manatu e mafai ona tatou faamatalaina ai lea tagata, o le FAATUATUA, po o le tama o le au faatuatua. O le faatuatua lea o Aperaaamo, e

ala ai ona usitai i fetalaiga e tulei mai i fofoga o le Alii. Tasi lea tala tatou te iloa ai lona usitai i le Atua, o le aveina a'e o lona atalii o Isaako, e osi ai le taulaga.

E ese le faigata, pe a tatou mafaufau loloto i lenei tala, e uiga i le aiga o Aperaamo. Ua na o Aperaamo lava ma Sara lana avā, ma si a la tama o e toatasi, o Isaako. A o lenei ua finagalo le Atua, e osi ai le taulaga i le Atua. Peitai, o i tatou te iloa ai, e faamuamua lava e Aperaamo lona Atua. E ui o si ona atalii e toatasi, ae na ia usitaia lava le finagalo o le Atua.

Le fanau e, e taua le usitai i matua, o faiaoga Aso Sa, o Faifeau ma isi tagata matutua, aua tatou te maua ai manuia o le Atua. Ua tatou iloa lava le taunuuga o lenei tala, na aumai lava e le Atua le tamai mamoe, e osi ai le taulaga a Aperaamo, e sui ai Isaako. O Aperaamo foi, na faamanuiaina o ia e le Atua. O lana fanau, ua pei o fetu o le lagi, na manuia foi iā te ia aiga uma o le lalolagi.

GALUEGA FAATINO: PASO

Saili mai upu nei i totonu o le paso/

(Tofotofo, Isaako, Moria, Asini, Taulealea)

A	S	T	A	U	L	E	A	L	E	A
P	O	O	E	R	T	S	A	N	M	I
U	P	F	O	P	T	R	A	F	G	S
A	M	O	R	I	A	N	M	L	S	A
S	A	T	U	P	I	O	P	E	T	A
F	K	O	L	P	A	S	I	N	I	K
A	E	F	S	A	T	U	P	O	I	O
E	T	O	A	S	K	L	O	P	I	E

PESE: Aperaamo Tama ma lana Fanau

A'OA'OGA:

1. O le usitai i matua na te maua faamanuiaga .
2. E le fiafia Iesu i le tamaitiiti le usitai.
3. O le Atua, o lo tatou fesoasoani sili.

ASO SA : 21 Aokuso 2022

MATAUPU: UA TAUVALAAU LE TAUASO IA IESU

SINI : Ia malamalama le vasega, ua na o Iesu e mafai ona faamaloloina ma'i o feagai ma i tatou.

TUSI FAITAU : Luka 18: 35-43 (Mo le Faiaoga)
Luka 18:35-38 (Mo le Vasega)

FESOASOANI MO FAIAOGA:

O lea ua latalata le galuega tala'i a Iesu Keriso i le nuu o Ieriko. Ua Ia ui atu foi i le auala e aga'i atu i lona faitotoa. Ae o i tonu lava i le auala lea o loo nofonofono ai le tagata tauaso, o loo ua faatoga atu ma aisi mo sina mea e maua mai i ai latou, o e o loo fegasoloa'i ma uia lea auala. Ua faalogo lenei tagata tauaso o loo ua talanoa le motu o tagata i tala e faatatau ia Iesu Keriso ma lana galuega tala'i lea ua oo atu. Ona ia fesili lea pe se a lea mea.

Ona fai ane lea o tagata, "O Iesu le Nasareta ua maliu ane." O i na le toe faatali ai lenei tagata tauaso, ma ua ia alaga loa ma le leo tele ma faatoga atu ia Iesu, "Iesu e, le alo o Tavita, ia e alofa mai ia te au."

O tagata uma o e na latou molimauina lea vaaia, ua latou vavao ia te ia mai lona pisapisao, peitai ua atili ai ona alaga leo tele o ia ma faatoga ia Iesu e fia malolo. "Le alo o Tavita e, ia e alofa mai ia te au."

Tamaiti, o le taimi lava na faafogaina ai e Iesu lea alaga. Ona tu loa lea o Ia ma fetalai atu, "ia ta'ita'iina mai o ia ia te Ia." Ona fesili loa lea i ai o Iesu ia te ia, poo le a le mea e manao i ai, ae tali lenei tagata, "Le Alii e, ia vaai o'u nei mata."


Ona fetalai atu loa lea o Iesu ia te ia, "Ina vaai ai ou mata; o lou faatuatua ua e malolo ai."

O i la tamaiti, na pupula ai loa ma mata o le tauaso. Ua ia savali ma oso ma vivii i le Atua ona ua faamaloloina lona ma'i.

O le feau foi lea mo i tatou le fanau, o a lava ituaiga ma'i tatou te maua ai. 'Aua lava nei galo i ai tatou ua na o Iesu Keriso tatou te malolo ai. 'Aua foi tatou te taofiofia se tasi o naunau lona loto e saili fesoasoani ia Iesu Keriso, e pei o le motu o tagata lea na latou taumafai e vavao le alaga atu a le tauaso i le Alii. I le ma le isi, ia tatou alolofa i soo se

tagata.

GALUEGA FAATINO: FAAFETAUI UPU MA O LATOU UIGA



PESE: TAUASO

O le Tauaso ua valaau mai
 Iesu sei e alofa mai
 Le motu o tagata ua le fiafia mai
 O ou mata nei ua fia vaai

TALI; Ou te vivii faamanu i le matai
 I lou alofa faaali mai
 O o'u mata nei ua pupula ma vaai
 Viia oe le matai.....(Fati: ta o le lua)

AOAOGA:

1. O Iesu le fomai sili
2. O Iesu e faamaloloina mai uma
3. Tatou o ia Iesu e maua ai le malologa sili.

ASO SA: 28 Aokuso 2022

MATAUPU: E TATAU GALUEGA ALOFA I LE SAPATI

SINI: Ia malamalama le vasega e le taofia le fai o galuega lelei i le sapati.

TUSI FAITAU: Mareko 3: 1 – 6 (Mo le Faiaoga)
 Mareko 3: 4 (Mo le Vasega)

FESOASOANI MO FAIAOGA:

O le sapati, o le aso lona 7, o le aso lea na malolo ai le Atua mai lana galuega foafoa. Lea e faamamalu nei e Iutaia ma le lotu Aso Fitu i Samoa nei. Peitai, na ala ona tatou faataua le Aso Sa e fai ma a tatou sapati, ona o le aso tonu lea na toe tu manumalo ai Iesu mai le oti ma le

tuugamau. E le taua le aso, ae o le mea e fia faamanatu e tusa ma le mataupu. Aua le tuua galuega lelei, po o galuega e manaomia ai e nisi la tatou fesoasoani.

O le isi lea moliaga na molia ai e le au faresaio ma tagata Iutaia Iesu. Fai mai ua fai galuega i le aso sapatī. Fai mai le tala tamaiti ua alu atu Iesu i totonu o le sunako po o le falesa, na iai le tagata ua lima gase (pē le lima). Ona faatalitali lea o le Au Faresaio pe faamalōlō e Iesu lenei tagata lima gase auā o le aso Sa. E manatu i latou e le faia ai ni galuega. Ua fetalai atu Iesu i le tagata lima gase ina ia tulai. Ona fesili lea o Ia i ai latou – *Pe sa ea le agalelei i le sapatī, po o le agaleaga, o le faaola po o le fasioti?* Ua vaavaai solo Iesu iai latou ma lona ita tele, aua o latou loto ua maaa. Ona faamalolo ai lea e Iesu o le lima gase. Ona taupulepule ai lea o nei tagata ia fasioti ia Iesu.

O se feau mo tatou le fanau, e tatau ona tatou faia o galuega lelei i le aso Sa. O galuega faaola e pei ona faia e Iesu. O galuega e tatou te fesoasoani atu ai i nisi.

Uiga o Upu

Lamalama : taupulepule, vaavaai se auala

Gase : pe, le mafai ona minoi

GALUEGA FAATINO: TALI MAI I LE SA’O PO O LE SESE. (True or False)

1. E tatau lava ona faia galuega alofa i e moomia se fesoasoani i le sapatī?
2. Na teena e Iesu le tagata lima gase
3. Na fiafia le au faresaio ina ua faamalolo e Iesu le tagata lima gase
4. O le galuega alofa le taele i le sami i le Aso Sa
5. Ua tatou faamanatu le sapatī i le Aso Sa ona o le aso na toetu ai Iesu

PESE: HE’S ABLE, HE’S ABLE

He’s able, he’s able

I know He’s able

I know my Lord is able to carry us through

(repeat)

He heals the broken-hearted

And set the captives free

He makes the lame to walk again

And the blind man to see! OH YES!

O le Atua na te mafaia

Ua ou iloa o ia e mafaia

Ua ou iloa e mafaia e le Alii ona fesoasoani mai

A’OA’OGA:

1. O Iesu o Ia o le Alofa
2. Ia e fesoasoani mo se ua manaomia lau fesoasoani.
3. ‘Aua le taele i le sami, ‘aua le fai taaloga i le Aso Sa.

SETEMA E FESOASONI MAI LE AGAGA O LE ATUA

O le Agaga o le Atua ua auina mai e avea ma fesoasoani sili ia i tatou i taimi uma o le ola. O le agaga e musumusu pea i totonu o le tagata ina ia faia na’o mea lelei e tusa o le finagalo o le Atua. Ua tatou talitonu ma le atoatoa, e le mafai ona tupu mai ni mea sese i a tatou faatinoga uma pe afai tatou matua faalagolago i le Agaga o le Atua.

ASO SA: 4 Setema 2022 (Aso Sa Talalelei)

MATAUPU : TALA O LE FAAOLATAGA

SINI : Ia malamalama le fanau, o le toetu o Iesu o le tala lelei lea i lana faaolataga mo le lalolagi uma.

TUSI FAITAU: Mataio 28:1 – 7 (Mo le Faiagoa)
Mataio 28:5 - 7 (Mo le vasega)

FESOASOANI MO FAIAOGA:

Ina ua tafa ata o le uluai aso ina ua mavae le sapatu, ona o atu ai lea o Maria le Makatala ma le isi Maria e asi le tuugamau o Iesu. Na o atu pea nei tina ma talatalanoa po o ai o le a ia fulieseina le maa mai le gutu o le tuugamau ona e fai lava si mamafa o le maa. Na faateia i laua ina ua latalata atu i le tuugamau ma iloa ai, ua leai se maa sa i le gutu o le tuugamau.

Ua taamomoe atu nei tina ma iloa ai le tagata ua ofu papa’e o loo nofo mai i luga o le maa. Ua fefefe i laua - A ua fai atu le agelu ia i laua, e aua le fefefe .. *“Aua ua lua te matatau . aua ua ou iloa ua oulua saili mai Iesu le na faasatauroina..E leo iinei o ia, aua ua toe tu mai o iapei ona fetalai atu ai o ia...”*Ona faatonuina lea oi laua e le agelu ina ia la o atu ma ta’u atu i soo o Iesu. Na tamomoe fiafia nei tina ma le tala fiafia ua toetu Iesu..Ae na faateia i lau ina ua faaali ifo i ai Iesu i le ala...Ua fai atu Iesu i ai laua – *Si o’u alofa..*Ona o ifo ai lea oi laua ua fetagofi i vae o Iesu ma ifo atu ia te ia, aua e moni lava ua toetu Iesu.

Ona fai atu ai lea o Iesu ina ia la o atu ma ta'u atu i ona soo, ina ia latou o atu i Kalilaia latou te iloa ai o ia. Ioe o le tala fiafia lea na ta'u atu e nei tina. O le Tala lelei ua toetu le Alii o Iesu Keriso. O le Tala foi lena lea tatou te faamanatu i lenei aso. O le Tala i le Toetu, o le tala o le manumalo o Keriso mai le oti ma le tuugamau. O se aoaoga mo tatou le fanau, o le faaolataga na faia e Iesu ua faaolaina ai oe ma a'u, ma i tatou uma.

Uiga o Upu:

Sinasina: pa'epa'emā
Tetemu: fefe

GALUEGA FAATINO: FAATINO LE TALA

- Faatino le Tala..Amata atu ina ua o tina e asi le tuugamau, se ia faaali ai le Alii.

PESE: Ta'u mai nei Tala Lelei..Tala Lelei naua...

Ta'u mai nei Tala lelei
Tala lelei naua
Tala o le alofa
Tala o le olioli

Tala Lelei x3, Naua

AOAOGA:

1. Ua toetu Iesu
2. Avea i tatou ma e ta'u atu le tala lelei
3. Aua tatou te faitatala

ASO SA : 11 Setema 2022

MATAUPU : UA FETOGI SETEFANO I MA'A

SINI : Ia malamalama le vasega – na fetogi Setefano i ma'a ona o lona faatuatua ma talitonu ia Iesu Keriso.

TUSI FAITAU : Galuega 7: 58 – 60

FESOASOANI MO FAIAOGA :

O Setefano o se tasi lea o tiakono sa tofia e le ausoo e folafola le tala lelei ia Iesu Keriso. O se tagata sa tumu i le Agaga Paia ma tumau lona faatuatua i le Keriso Toetu. O le galuega lea a Setefano na itagia ai o ia e tagata maualuluga o le malo, ma nisi o taitai o le Lotu Iutaia. Na taumafai ni tagata mai Kurene ma Asia ma isi atunuu e tete'e atu ia Setefano ma ana aoaoga i le tala lelei ia Iesu Keriso. Peita'i, e le'i mafai ona latou taofia le galuega folafola a Setefano. O le Agaga o le Atua sa auai ia Setefano, o le malosi lea na mafua ai ona toa le loto o le tama o Setefano e faia lana galuega.

Fai mai le tala tamaiti, a'o faia le galuega lea a Setefano o le folafola atu pea o le Tala Lelei. Na tupu tele ai le ita i tagata ma ua latou su'e ai loa se auala e fasiotia ai Setefano. Na faia le tonu e nei tagata ma ua latou manatu ai loa, o le a ave Setefano e fasioti, e ala lea i le tau'ai pe fetogi i maa. Ua latou taitai ia te ia i tua o le aai ona tatala ese lea o lona mitiafu ona fetogi loa lea i maa.....(*O ai na te iloa o ai le tagata lea na ave ai le ofu o Setefano???...O se fesili e vavae ai le faamatalaina o le tala, ma tuliloa ai le faitauga o le Tusi Paia..*). Ioe! O Saulo.

Ua iloa e Setefano ua vaivai o ia, ona tatalo ai lea i le Atua. Fai mai upu o le tatalo a Setefano – *Le Alii e Iesu, ia e talia mai lo'u nei agaga..*Ua alaga foi ia i le Atua ma le leo tele, ona moe ai lea o ia. O lona uiga, ona oti ai lea o ia. O le loto tele o le tama lenei o Setefano na ia le fefe ai e tautino le mea moni e ala i le tala'i atu o le finagalo o le Atua. E mafua ona loto tele Setefano, ona o lona faatuatua ma talitonu i le Tala Lelei ia Iesu Keriso. O se aoaoga foi lea mo tatou le fanau, ia tatou faatuatua ma talitonu i le Keriso Toetu. O ia e tatou te le fefefe ai e tautino le mea moni ua ia finagalo ai...

Uiga o Upu

Tulei : ta'ita'i, ave

Fetogi : tau'ai

GALUEGA FAATINO: Toe Faatulaga mai Upu nei i le upu sa'o?

1. Tefanose.....(Setefano)
2. Asulo.....(Saulo)
3. Fegito.....(fetogi)
4. Enerku.....(kurene)
5. Otisifa.....(fasioti)

PESE: **SETEFANO LOTOTELE**

Setefano o se tagata lototele

Faatuatua ma le le fefe

O lana molimau ia Iesu Keriso

Na ala ai lo latou inoino

E lei faafiti ai lava
 Pe solomuli i le faasalaga
 E ui ina matuitui ona tiga
 E lei lilo lava i le Tama

Na ia iloa atu le tama
 Ma Iesu i ona tafatafa
 Le faamoemoe ia tini iina
 O le nuu faa-le-agaga
 Faamagalo atu i ou fili
 Salamo loa ma foi i le Alii
 Ua nao Ia lava le Alofa
 E maua ai manuia..... (tune:O Ruta o se teine lototele)

Tali

Uso e, ia faamalolosi pea
 Molimau atu i soo se mea
 Le tala lelei o le faaolataga
 Ia ola ai soo se tagata.

A'OA'OGA:

1. Aua tatou te fefefe e ta'u le mea moni.
2. Ia tatou loto tetele pei o Setefano.
3. Ia tumau le faatuatua

ASO SA : 18 Setema 2022

MATAUPU : UASAEIA E SAMASONI LE LEONA

SINI : Ia malamalama le vasega o le saeia e Samasoni o le leona ua faaalua ai le malosi o le Atua o lo o ia Samasoni.

TUSI FAITAU : Faamasino 14:5 – 6

FESOASOANI MO FAIAOGA:

O Samasoni o le atalii o le tamaloa e igoa ia Manoa, o ia o le tagatanuu o Isaraelu. O le tama

lenei o Samasoni sa faamanuia i ai le Alii. O se tama aumalosi i lona tuputupu a’e i totonu o lona aiga. Fai mai le tala ina ua oo i le tasi aso, ona ifo ai lea o Samasoni ma lona tama, faatasi ai ma lona tina o Timenata. Ua o’o atu i latou i le tovine, ona faateia lea o i latou ina ua alu atu le leona taanoa. O le manu lenei o le leona o se manu feai, e fefefe tele ai tagata. O se manu foi e malosi.

E lei fefe le tama o Samasoni ina ua ia vaai i lenei leona feai. Na osofia pe ua iai foi le Agaga o le Atua ia Samasoni. O le Agaga lea Tamaiti, na tuuina le malosi ia Samasoni. O le malosi lena o Samasoni na ia fasia ai ma pe lenei leona feai. E ui i le malosi ma le feai o lenei leona, ae lei mafai ona manumalo ia Samasoni ona o lona malosi na tuuina i ai e le Agaga o le Atua. E le i i ai foi se auupega na faaaogaina e Samasoni e fasia ai le leona. E le’i iloa foi e matua o Samasoni le gaoiga na faia e Samasoni, e ala lea i lona saeia lea o le leona taanoa.

O le malosi o Samasoni, o le faamanuiaga lea a le Atua na tuuina mo Ia. Na ia mafaia ai ona ia faatoilalo le malosi o le leona taanoa. O se aoaoga foi lea mo tatou le fanau – E aumaia e le Atua le malosi i ai tatou, tatou te faia ai feau ma nisi mea faigata tatou te fetai. E tele luitau ma mea e tatou te manatu e le gafatia e lo tatou malosi. Peitai, lea ua aoao mai le tala ia Samasoni, e tatou te mafaia mea uma i le faatasi mai o le Agaga o le Atua.

Uiga o Upu:

Tovine : faatoaga vine

Saeia : fasia, tape

Leona taanoa : leona fafine e lei faia sana tama

GALUEGA FAATINO : PASO

Saili mai upu nei i totonu o le paso?

Samasoni, tovine, saeia, leona, agaga, osofia.

S	A	N	M	O	S	O	F	I	A
O	P	U	I	O	T	T	E	U	N
S	A	M	A	S	O	N	I	V	M
E	R	T	S	U	V	O	P	L	A
A	F	K	L	O	I	E	S	A	G
T	U	I	O	U	N	A	A	V	A
L	E	O	N	A	E	P	U	T	G
P	O	I	U	T	S	A	E	I	A

PESE : Samasoni o le Toa

1. O Samasoni o le toa,
O le atalii o Manoa
Na filifilia e le Atua mo Ia
E malosi ma matutia
Aua o ia na ia fasia
Le leona taanoa ua ia saeia
O Samasoni o le toa,
O le atalii o Manoa
Na filifilia e le Atua mo Ia.....Fati: My God is so Big

A'OA'OGA:

1. O le Atua e ona le malosi uma lava
2. Aua tatou te faavaivai i mea faigata o le ola
3. E mafaia mea uma i le faatasi mai o le Atua

ASO SA : 25 Setema 2022

MATAUPU : O LE FUA O LE SINAPI

SINI : Ia malamalama le vasega o le fua o le sinapi o se fatu e itiiti ma faatauva, ae tupu mai ai se laau e tupu tele.

TUSI FAITAU: Mareko 4: 30 – 32

FESOASOANI MO FAIAOGA :

O le tatou tala sa faitauina, o se faataoto po o se tala faa-faatusa a Iesu i le fua o le laau lea o le sinapi. O le laau lea e le maua iinei ia tatou tamaiti, ae maua i atunuu mamao. Ua faatusa e Iesu le malo o le lagi e pei o le fua o le sinapi. Ea le fua o le sinapi??

O le fua o le sinapi, o se fatu e aupito sili ona laitiiti ma faatauva mai fua uma o isi laau, ae a oo ina totoina i le eleele, ona tupu a'e lea ma avea ma laau e tupu tele. E sili atu i laau afu po o laau tetelē uma o le vao. O ona lala ua fai lea ma nofoaga e o atu manu felelei ma nonofo ai ma momoe ai ona o lona paolo.

O se aoaoga foi lea mo tatou le fanau, ia avea i tatou ma fua o le sinapi e itiiti ma faatauva'a ae tupu mai ai se laau tele. Ia avea lo tatou faatauva'a ma ala e susulu atu ai le tala lelei ina ia mafalā pe tupu tele i totonu o tatou aiga, o nuu ma le Ekalesia. Aua foi tatou te manatu faatauva'a i ai tatou, e faaaogaina e le Atua lo tatou tamaitiiti e ala mai ai lona finagalo. E tatau ai ona tatou ola e tusa o le finagalo alofa o lo tatou Atua. Ia tatou tutupu a'e ai i le tala lelei, ma avea ai i tatou ma nisi e ofoina atu le fesoasoani mo nisi i le lumanai.

Uiga o Upu;

Laau afu : laau tetelē, laau tupu maualuga.

GALUEGA FAATINO: Taliga Fesili

1. Tusi mai ni upu e faamatala ai le fua o le sinapi?
2. O le a se aoga o lālā o le sinapi o lo o ta'ua i le tala?
3. O le a le uiga o le laau afu?

PESE : Fua o le Sinapi

Le fua o le sinapi, (e faatauva'a x2)x2

Ua sosolo malosi ona a'a

Le fua o le sinapi, (e laitiiti tele x2) x2

Tupu ma taufelegele.....Fati : E faapenei ona alo le vaa!!!

A'OA'OGA:

1. Aua tatou te manatu faatauva'a i ai tatou lava
2. Ia avea tatou ma tagata aogā i le lumanai
3. Ia tatou faasusulu atu amio faa –le- Atua.

OKETOPA TUMAU I LE ALII

O le tagata e tumau i le Alii, o le tagata lea e iu manuia le olaga. A ua tatou i ai foi i le soifuaga o lo o malosi ai le fili e taufaasooso. E ono avea ma ala e femoumouai ai faaiuga fai a le tagata. O le faamoemoe lea o mataupu o lenei masina. Ina ia aoaoina fanau ina ia tumau lo latou faatuatuaga i le Alii.

ASO SA : 23 Oketopa 2022

MATAUPU : UA MANA’O AAPO I LE TOVINE A NAPOTA

SINI: Ia malamalama le vasega o le ola mana’ona’o i mea a isi, e le’o se mea lelei, aua e i’u ai ina faia ai nisi gaioiga e le talafeagai.

TUSI FAITAU : 1 Tupu 21: 1 - 3

FESOASOANI MO FAIAOGA :

O Aapo o le tupu o Samaria, o lona toalua o le fafine e igoa ia Iesepela. Fai mai le tala, sa i ai se tagata e igoa ia Napota o le tagata e sau mai Isereelu. Sa nofo latalata ane lenei tagata ma lana tovine i le fale o Aapo le Tupu. Ua vaai atu Aapo, ese le manaia o le Tovine poo le faatoaga vine a le tagata lenei o Napota, ona tupu ai lea o lona mana’o .

Ua fai atu Aapo ia Napota ina ia aumai ma Ia o lana tovine e fai mo ona fanua e toto ai ana laau ‘aina, toe latalata ane i lona fale. E mafai foi ona ia avatu se isi tovine ma ia e sili atu nai lo lana tovine. Ae le gata i lea e mafai foi ona ia avatu le tupe e faatau ai le tovine ma Ia.

Fai mai le tali a Napota ia Aapo, *Ia faamamao e le Alii ia te a’u ona ou avatu ia te oe le tofi o o’u tama*. E lei manao Napota e foai lana tovine ia Aapo ona o lona manatu, o lona tofi lea po o le tovine lea na tuuina mai e lona Tamā mo Ia. E ui ina ofoina e Aapo ni tupe e tele mo le tovine, ae lei mafai ona malie ai Napota e foai lana meaalofa mai ona Tamā.

O se aoaoga foi lea mo tatou le fanau – Aua tatou te ola mana’ona’o fua i mea a isi tamaiti, a ia tatou maua pea le fiafia i mea ua tatou maua. O le mana’ona’o fua i mea e tatou te le’o maua, e tupu ai nisi gaioiga sese e pei o le gaioi. Aua le mana’o fua i mea a isi tagata.

Uiga o Upu:

Tovine : faatoaga vine

GALUEGA FAATINO: Tusiga Ata.....

Ia tuu pea le avanoa i nai fanau e taumafai ai ona tusi mai ni ata, tusa lava po o le a le ituaiga ata e mafai ona tusia, o nisi o fanau e fiafia foi i tusiga ata.

Ata 1. Napota ma le togavine

Ata 2. Tupu o Aapo o lo o vaai agai i le tovine a Napota

Ata 3. Aapo ma Napota o lo o talanoa

Ia tuu le avanoa i ni tamaiti se toatolu, e tulai ai e faaali ma faamatala a latou ata.....

HAKA (PESE TAULOTO):

Aapo o le Tupu o Samaria
 Augani atu tovine ma Ia
 Napota ua tali leai soia
 Aapo ua tumu i le le fiafia.....Hii

A'OA'OGA:

1. Aua tatou te ola mana'ona'o
2. Fiafia i mea ua tatou maua
3. O le ola mana'ona'o e aveva ma ala e fai ai le mea sesē.

ASO SA : 30 Oketopa 2022

MATAUPU : UA TOE OLA LE TAULE'ALE'A

SINI : Ia malamalama le vasega na faia e Iesu le vavega ina ua Ia toe faaola i le taulealea.

TUSI FAITAU : Luka 7: 11 - 15

FESOASOANI MO FAIAOGA:

O lo o faagasolo pea le galuega a le Alii Faaola e ala lea i le aoao atu, faamalolo i e mama'i, tutuli temoni ma isi lava galuega alofa. Ua oo atu nei le talaiga a Iesu i le nuu lea o Naina, na o atu faatasi i latou ma ona soo, ae o lo o mulimuli atu ai foi ma le motu o tagata e toatele. Ina ua latalata atu i latou i le faitoto'a o le aai, ona iloa atu ai lea e Iesu o tagata o lo amo mai le fata o lo o i ai i luga le taule'ale'a ua oti.

O le tama lenei ua oti, na o le pau lava lea o le tama a si ona tina. O le tina foi ua oti lona toalua, a'o lea foi ua maliu atu si ana tama e toatasi. O lona uiga, ua totoe ai nao le fafine i si ona aiga. *(o le aiga i manatu o le vaega lea o le aiga i Matua ma fanau)*

Ua vaai atu Iesu i si fafine lenei, ona tupu tele ai lea o lona alofa ia te ia, auā o lo o tagi lava i le alofa i si ana tama ua oti. Ona fetalai atu ai lea o Iesu ia te ia,,*Aua e te tagi.* Ua savali atu Iesu i le fata o lo o i ai le tama ona pa'i atu ai lea o Ia. Ua tilotilo mai tagata na latou amoina atu le fata ia Iesu, ma faatalitali po o le a se gaoiga a Iesu o le a faia i le taule'ale'a.

Ua uma ona pa'i Iesu i le fata, ona ia fetalai atu lea *Le Taule'ale'a e, ou te fai atu te oe, Ina tulai ia...* Ioe Tamaiti! Ona nofo ai lea i luga o le tama na oti, ua tautala o ia, ona tuuina atu lea o ia i lona Tina. Ua fiafia lava lenei tina, aua ua ola lana tama i le vavega na faia e Iesu. O se aoaoga mo tatou, e alofa Iesu i tagata ua manaomia se fesoasoani. E mafaia e Iesu ona faia vavega.

GALUEGA FAATINO:FAATUMU AVANOA

Faatumu avanoa i upu o lo o i lalo??

Pa'i, Naina, fata, mutimutivale, maliu, tane.

Ua 1. _____ atu Iesu i le aai o 2. _____ le igoa. Faauta foi ua 3. _____ mai le tagata oti. O le tama e toatasi a lona tina. O le tina foi ua oti lana 4. _____. Ona 5 _____ ai lea o lona alofa ia te ia. Ua alu atu Iesu ma 6. _____ atu i le fata, ona famalolo ai lea o le tama.

1-maliu, 2-Naina, 3-fata, 4-tane, 5-mutimutivale, 6-pa'i

PESE : O LIMA O IESU

O lima o Iesu o lima agalelei

E alofa i tagata uma

E faamalolo i tagata mamai

Ma faamanuia i tamaiti

O nai ona lima e auauna atu

E tali i lau valaau

O lima o Iesu o lima agalelei

E alofa i tagata uma

A'OA'OGA:

1. E faia e le Atua vavega i lo tatou ola
2. Ia tatou ola fesoasoani
3. Alofa i soo se tagata

ASO SA : 6 Novema 2022

MATAUPU : UA TAUTINO RUTA IA NAOMI

SINI : Ia malamalama le vasega o le tautinoga a Ruta, na iloa ai lona alofa faamaoni ia Naomi

TUSI FAITAU : Ruta 1:16 – 17

FESOASOANI MO FAIAOGA:

O Naomi o le tina sa i ai lana fanau tama e toalua, o igoa o nei tama o Maalona ma Kiliona. Sa faaiipoipo atu nei tama i teine e toalua mai le nuu o Moapi o le tasi o Orepa, ao le igoa o le tasi o Ruta. Sa aumau i latou i le nuu o Moapi ona sa tupu tele le oge i Peteleema, o le nuu lea o Naomi ma lana fanau tama e toalua. A’o nonofo ai pea i latou i Moapi, na maliliu uma ai tama nei e toalua o Maalona ma Kiliona, ona toe foi ai lea o Naomi i lona nuu o Peteleema.

Fai mai le tala tamaiti, na toe foi Naomi ae mulimuli atu ai ma Orepa ma Ruta. (*O ai foi Orepa ma Ruta ???, o se fesili e tuliloa ai le fanau*) Ioe! O toalua ia o tama a Naomi ua maliliu. Ua alu le malaga a Naomi ma tina ia e toalua, ona faiatu ai lea o Naomi i ai laua ina ia toe foi i lo la nuu o Moapi. Ona toe foi lea o le isi e igoa ia Orepa, ae faaaau ai pea le malaga a Naomi ma Ruta.

Na alu pea le malaga a Ruta ma Naomi, ona toe fai atu ai lea o Naomi ia Ruta, ina ia toe fo’i ia i lona nuu ma lona aiga. Ona tautino atu lea o Ruta ia Naomi, fai mai Ruta,*o le mea e te alu i ai, ou te alu ai foi, o le mea ou te nofo ai, ou te nofo ai foi, e fai lou nuu mo’u nuu, e fai foi lou Atua mo’u Atua, o le mea e te oti ai ou te oti ai foi.....*

O upu ia na tautino ai Ruta ia Naomi, o upu ua tatou iloa ai le le fia alu ese o Ruta mai ia Naomi. E manao e mulimuli pea i ai i soo se mea e alu ai Naomi, e oo lava i le oti. O le tautino a Ruta ua tatou iloa ai le alofa faamaoni o Ruta ia Naomi, ua pei lava Naomi o sona tina moni, auā ua fia mafuta pea ma ia e oo lava i le oti. Ua aoao mai foi mo tatou le fanau, ia tatou alolofa faamaoni i o tatou matua. E iloa lo tatou alolofa faamaoni i matua, ina ua tatou faalogo ma usitai i faatonuga a matua.

Uiga o Upu:

Tuulafoai: alu ese, tia’i, sola, lafoai

GALUEGA FAATINO: Faafetaui Upu i o latou uiga ma faamatalaga?

Naomi :	leai ni meaai ma ni vai
Maalona:	o le tina o Maalona
Ruta :	O le tama a Naomi
Oge:	O le fafine Moapi

PESE: RUTA O SE TEINE LOTO TELE

Ruta o se teine loto tele

Faamaoni ma le le fefe
 O lana tautoga e oo i le oti
 A ua maua ai lona tofi
 Le tautua a le Moapi
 Ma lona loto sa faatasi
 Tumau pea lo la fealofani
 Seia oo lava i le lagi

A'OA'OGA:

1. Alofa faamaoni i o tatou matua
2. Faalogo ma usitai i matua ma e matutua
3. Tumau i le Atua e manuia ai.

ASO SA : 13 Novema 2022

MATAUPU : O MARIA MA LONA USO O MARETA

SINI : Ia malamalama le vasega o le galuega fesoasoani a Maria ma lona uso o Mareta, na toe ola ai lo la tuagane o Lasalo.

TUSI FAITAU : Ioane 11:1 – 4

FESOASOANI MO FAIAOGA:

O Maria ma lona uso o Mareta, sa i ai lo la tuagane o Lasalo i le nuu o Petania. Sa ma'i tigaina le tama o Lasalo ma ua manaomia se fesoasoani. Ona ave ai lea o le feau a ona tuafafine o Maria ma Mareta ia Iesu, ina ia alofa mai i le ma'i o le la tuagane o Lasalo. Ua faalogo ai Iesu i le feau na avatu, ona faapea ai lea o ia – *O lenei ma'i e le i'u ina oti, a ona o le viiga o le Atua ina ia viia ai le Atalii o le Atua.* O lona uiga tamaiti, o le ma'i o Lasalo e le tatau ona oti, peita'i o le tala na iu lava ina oti Lasalo, ina ia iloa ai le mana silisili ese o Iesu Keriso.

O le auuso nei o Maria ma Mareta o ni tina e fiafia i le ola tatalo ma mafuta i le Atua. O Maria lea o lo o ta'ua na ia u'u le Alii i le uu manogi ma soloi foi ona vae i lona laulu. O ni tina foi e ola faatuatua i le mana faamalolo o le Alii Faaola. Le mafuaaga lea na alu ai le la poloai ia Iesu ina ia alofa mai i le ma'i o lo la tuagane o Lasalo.

O le galuega na faia e Maria ma Mareta e ala lea i le saili fesoasoani ia Iesu, na ola ai lo la tuagane o Lasalo. O le galuega na faia faatasi ma le ola faatuatua, ma le talitonu o Maria ma lona uso o Maretai le mana laveai o Iesu. O se aoaoga foi lea mo tatou le fanau, ia tatou saili fesoasoani i le Atua i taimi e oo mai ai puapuaga. Ia tatou saili faatasi ma lo tatou ola faatuatua ma talitonu atoatoa e faia e le Atua vavega i lo tatou ola.

GALUEGA FAATINO: Taliga Fesili

1. O ai le nuu o Lasalo?
2. O le a le faia a Maria ma Mareta?
3. O le a le galuega na faia e Maria o lo o ta'ua i le tala?
4. Faamatala se galuega fesoasoani sa e faatinoina? (Fesili lautele)

HE'S ABLE, HE'S ABLE

He's able, he's able

I know He's able

I know my Lord is able to carry us through

(repeat)

He heals the broken-hearted

And set the captives free

He makes the lame to walk again

And the blind man to see! OH YES!

O le Atua na te mafaia

Ua ou iloa o ia e mafaia

Ua ou iloa e mafaia e le Alii ona fesoasoani mai

A'OA'OGA:

1. Ia loto fesoasoani
2. O Iesu le fomai sili
3. Ia alofa le tasi i le isi.

ASO SA : 20 Novema 2022

MATAUPU : UA FAIA LE TUPUA AURO

SINI : Ia malamalama le vasega o le faia o le Tupua auro, o le le usitai lava lea o Israaelu i le Atua.

TUSI FAITAU : Esoto 32 :1 – 4

FESOASOANI MO FAIAOGA :

Na alu a'e Mose i le mauga ina ia tuuina ifo ai tulafono a le Atua, a'o nonofo pea le nuu o Isaraelu i lalo o le mauga. Peitai, ua manatu le nuu ua leva tele ona alu Mose, ailoga foi a toe foi ane. Ona faapotopoto lea o i latou uma e toatele, ma ua latou o atu ia Arona ma fai atu ia te ia, *Tu ia oe i luga ma ia e faia se atua mo i tatou.....* Ona fai atu lea o Arona ina ia motusi ese o mama auro o i taliga o a latou avā, ma o latou atalii, ma o latou afafine ma avane ia te ia.

Ua usitai uma le nuu i le faatonuga na fai atu ai Arona, ma ua motusi o latou mama auro. Ua latou avatu ia Arona, ona fai ai lea e Arona o le tamai povi auro. Ua uma ona fai le tamai povi auro, ua manaia le iila mai ma matagofie i le vaai. Ona fai atu lea o ia i ai latou, *o lou atua lenei, o le na aveina ae oe nai le nuu o Aikupito.* O lea ua fai le tupua auro ma atua o Isaraelu, ae tuu lo latou Atua moni e toatasi. O le tupua auro e leai se ola, e le mafai ona tautala, e leai foi sona mana ma sona malosi. Peitai, lea ua ifo i ai le nuu o Isaraelu.

Ioe tamaiti! O le faia e Isaraelu o le povi auro ma latou ifo i ai, o lo latou le usiusitai lava lea i le Atua. Aua fai mai foi ea le tulafono muamua??? *Aua nei fai mo oe ni atua ese i o'u luma...* Ua le usiusitai le nuu o Isaraelu i le Atua. O se aoaoga foi lea mo tatou le fanau, ia tatou usiusitai i o tatou matua, aua nei o tatou pei o Isaraelu auāua le faalogo i le Atua. O lo tatou usiusitai i o tatou matua, o lo tatou usitai lava lea i le Atua.

Uiga o Upu:

Faatuatuai: tuai ona alu ifo, leva ona alu

Motusi : momotu ese, aveese

GALUEGA FAATINO : Faatumu Avanoa

Faatumu avanoa i upu nei?

Tamai povi auro, Arona, motusi, faatuai, tagata.

1. Ua iloa e le nuu ua _____ ona alu ifo Mose nai le mauga.
2. Ona faapotopoto ai lea o le nuu ma fai atu ia _____.
3. Ia outou _____ ese o mama auro i taliga o a outou ava.
4. Na faatusa e le nuu o Isaraelu le Atua i le _____ _____ _____.

PESE:MOSE LE AUAUNA A LE ATUA

Mose le auauna a le Atua

Ma Arona lona uso matua

Ua alu ae ia i le mauga i le fanua

Ina ia feiloai ma lona Atua.

Ao Isaraelu ua le faatuatua
 Ua latou faia o le tupua,,tupua
 Ua le manatua o le alofa o le Atua
 Na aumai ai latou mai le vaomatua.....(Fati Masani pese 5..Le Alii e le Atua e..)

A'OA'OGA:

1. Aua le faalogogata i matua
2. Faalogo ma usitai
3. Aua le tosina gofie i isi mea e leaga ai

ASO SA : 27 Novema 2022

MATAUPU : UA VAVAO E IESU LE MATAGI

SINI : Ia malamalama le vasega o le mana o Iesu na te'a ai le malosi o le matagi

TUSI FAITAU : Mataio 8: 23 - 27

FESOASOANI MO FAIAOGA:

Ua alu atu Iesu i le vaa, ona o atu ai foi lea ma ona so'o ua latou o faatasi ma Ia. Ao alu le malaga a Iesu ma ona soo i luga o le vai, na faafuasei lava ona agi mai le afa malosi, ma ua sousou ai le sami. Ua osofia lo latou vaa e le suasami, ma ua faigata ai ona alu le vaa. Ua fefefe le ausoo aua ua malosi tele le matagi ma ua atili sousou ai le sami. Ao le taimi lea, o lo o moe Iesu i luma o le taumua po o le pito i luma o le vaa.

Ona o atu ai lea o ona soo ma fafagu ia Iesu. Ua latou faapea atu – *Alii e, faaola mai, a matou fano..* Ua ala Iesu ma ua ia iloa le fefefe o ona so'o ona o le malosi tele o le afa. Ona fai atu ai lea o Iesu i ona soo, pe aisea lava ua leai ai so latou faatuatua. (*Se a le mea ua outou matatau ai, outou o e faatuatua itiiti?*). Ona tu lea i luga o Iesu ma vaai atu i le matagi malosi, ona ia vavao (taofi) lea i le matagi. Na vaaia le te'a o le matagi malosi, ma ua malū foi le sami, ona o le mana o le Alii Faaola.

Ua vaaia le taufaiofo o i latou ma ua latou tuu fesili – (*Pe se a le uiga o lenei tagata ua usiusitai ai le matagi ma le vai??*) O le uiga o le fesili a nei tagata, o se tagata uiga ese Iesu, aua ua na'o Ia lava ua mafai ona ia taofi i le matagi ma le vai. O mea e le mafai e se tagata ona faia, lea e mafai ona fai e Iesu. A ua mafai ona faia e Iesu, ona o lona mana laveai.

Ua a'oa'o mai foi mo tatou le fanau. O a mea e faigata ona tatou faia, e mafaia ma faigofie mea uma ina ua tatou faamoemoe i le auai mai o le mana o le Alii Faaola. E tatau ai ona tatou faatuatua ma talitonu ia te Ia.

Uiga o Upu:

Osofia : sao ai le vai, oso ai le vai

Peau : suasami, galu

Taufaifo: ofo uma le ausoo,

GALUEGA FAATINO: PASO

Saili mai upu nei i totonu o le paso?

Osofia, peau, fafagu, faatuatua, taufaifo, matagi.

E	P	E	A	U	A	F	G	O	M
A	S	E	R	G	G	I	U	P	A
R	T	U	F	A	S	L	O	P	T
L	F	A	A	T	U	A	T	U	A
O	S	O	F	I	A	E	T	V	G
L	K	P	A	F	S	V	M	N	I
O	U	P	G	P	R	T	A	E	U
M	T	A	U	F	A	I	O	F	O

PESE: IESU O LE ALII O MATAGI MA AFA

E faapenei na alo le vaa, alo vaa, alo le vaa

E faapenei na alo le vaa i le vai o Kalilaia

E faapenei na moe Iesu, moe Iesu, moe Iesu

E faapenei na moe Iesu i le vaa i Kalilaia

E faapenei na fati o galu tetele, galu tetele, galu tetele

E faapenei na fati o galu tetele i le afa i Kalilaia

E faapenei na fafagu Iesu, fafagu Iesu, fafagu Iesu

E faapenei na fafagu Iesu e ona soo i Kalilaia

E faapenei na taofi le afa, taofi le afa, taofi le afa

E faapenei na taofi le afa e IESU I KALILAIA

A'OA'OGA:

1. Tatou faamoemoe i le mana o le Atua
2. Aua tatou te fefefe i mea faigata o le ola
3. E faia e Iesu mea sili i lo tatou ola

TESEMA: O IESU LE FAAOLA

O le masina leni e tatou te faamanatuina ai le fanau mai o le Alii Faaola o Iesu Keriso. O le faaolataga mo le lalolagi atoa, e ala i le soifua o Iesu Keriso. E tatou manatua ai pea lea faaolataga o le meaalofo ua foaifuaina mai e le Atua mo i tatou.

ASO SA : 4 Tesema 2022

MATAUPU : SAKARIA LE OSITAUAGA SILI

SINI : Ia malamalama le vasega o Sakaria o se tagata e toaga e ulufale i le malumalu ma faamaoni i lo la va ma le Atua.

TUSI FAITAU : Luka 1 : 5 - 7

FESOASOANI MO FAIAOGA:

I taimi a'o avea ai Herota ma Tupu o Iutaia, sa i ai le tasi tagata e igoa ia Sakaria o ia o le ositaulaga sili. O ia o se tagata sa tofia e ulufale i totonu o le vaega paia o le malumalu, mo le faia o taulaga a Isaraelu i le Atua. Ae le gata i lea, o ia foi o se tagata amiotonu i luma o le Atua, ma faamaoni e tausii poloaiga ma tulafono.

O tiute faa-ositaulaga o Sakaria, o le mafuaaga lea o le toaga o Sakaria e ulufale i le malumalu. E le gata e ulufale e fai le taulaga, ae o lo o ulufale foi e vivii ma tapuai i le Atua. O le ala foi lea na maua ai e Sakaria nisi o faamanuiaga mai le Atua.

O se aoaoga foi lea mo tatou le fanau. Ia tatou toaga e ulufale i le malumalu, o le malumalu po o le falesa o le fale lea e tatou te o ai e ave le taulaga ma faafetaia le agalelei mai o le Atua. O lo tatou toaga e o i le falesa e tapuai i le Atua, o le tele foi lea o faamanuiaga tatou te maua. Aua le paie tatou e omai i le lotu, a ia toaga e omai i le Aoga Aso Sa ma le lotu.

Uiga o Upu:

Le Mata'ulegaina : leai se mea leaga ai, leai se mea e ta'u leagaina ai.

GALUEGA FAATINO: Tusitusiga

Faaaoga mai igoa o tagata nei i ni fuaiupu e faatatau i le tala sa faamatalaina?

1. Herota
2. Sakaria

PESE: SAVALI TAUTALA I LE MALAMALAMA

Omaia tatou uma ma mafuta fiafia

Savali, savali i le malamalama

Tatou fealofani se'i afio mai o ia

Savali, savali i le malamalama

Tali

Savali tautala i le malamalama

Savali tautala i le malamalama

Savali tautala i le malamalama

Savali faatasi ma le Atua

A'OA'OGA:

1. Ia toaaga e ulufale i le malumalu i Aso Sa
2. Tapuai i le Atua ma le faamaoni
3. E alofa Iesu i le tagata faamaoni

ASO SA : 11 Tesema 2022

MATAUPU : O LE FETU I SASA'E

SINI : Ia malamalama le vasega, o le fetu i sasa'e o le faailoga o le fanau mai o Iesu le Faaola.

TUSI FAITAU : Mataio 2:1 - 2

FESOASOANI MO FAIAOGA :

O ona po ao avea Herota ma tupu o Iutaia, o le taimi foi lea na fanau mai ai Iesu i le aai o Peteleema i Iutaia. Na iloa e le au makoi le fetu i sasa'e ua tulaga ese lona pupula mai fetu uma o le lagi. O le faailoga lea na iloa ai e makoi, ua fanau mai le Tupu o tagata Iutaia. Ona latou mulimuli ai lea i le fetu e su'e le nofoaga o lo o fanau ai Iesu.

Na taitaina le Au Makoi e le Fetu i sasa'e i Peteleema i le fale na fanau mai ai le Tama o le faaolataga. O le tama e sau e faaola le lalolagi agasala. Na maua e Makoi le pepe o le faaolataga, ona latou ifo atu ai lea ia te Ia, ma ave a latou meaalofa.

Tamaiti! Ua tatou i ai i le agai atu i le aso Kerisimasi, o aso o faigameaalofa. O le a sa tatou meaalofa mo lo tatou Alii Faaola o Iesu Keriso? Ia avea lenei Kerisimasi e tatou te fai meaalofa ai i le pepe fou e ala lea i le faalia o o tatou uiga faa-Iesu. O le meaalofa sili lea e fiafia ai o tatou matua, ae sili ai ona viia le Atua.

GALUEGA FAATINO : Faatino se vaaiga puupuu i le tala ina ua vaaia le Fetu i Sasa'e

PESE:VAAIA LE FETU

Vaaia le fetu
 Susulu mai le lagi
 Faailoga, o le afio mai
 O le Alo e toatasi

A'OA'OGA:

1. O Iesu na ia faia le faaolataga
2. Manatua sa tatou meaalofa o lenei Kerisimasi
